

東坡七集

冊七



東坡後集目錄

第一卷

詩六十四首

次韻劉景文西湖席上 次韻答馬忠玉

別諸山作三絕句

次韻答黃安中兼簡林子中

留別蹇道士拱辰

次韻書王晉卿畫山水二首

又書王晉卿畫四首山陰陳迹 雪谿乘興 四明

狂客 西塞風雨

破琴詩

題王晉卿畫後 聽武道士彈賀若

東堂次諸公舊詩韻三首

次韻子由晉卿所和二首

感舊 戲作放魚

復次放魚前韻

九月十五觀月聽琴西湖

次韻謝趙景貺陳履常見和

送歐陽主簿赴官韋城四首

泛潁 六觀堂老人草書

次韻劉景文見寄

次韻督兩歐陽詩破陳酒戒

勸履常飲

臂痛謁告作三絕句

到穎公祭已竭齋廚索然

兩歐陽許唱和以此句挑之

贈月長老

次韻答錢穆父見寄

答王定國

送歐陽推官赴華州監酒

以病在告獨酌

有懷諸君子望夜月庭招之

歐陽季默以油煙墨見餉

明日復以大魚為餽

和趙景貺栽檜

葉待制求先墳永慕亭詩

與趙陳同過歐陽叔弼小齋

聚星堂雪

叔弼誦淵明事歎其絕識

喜劉景文至

禱雨龍公既應次韻劉景文

戲書樂天身心問答後

西湖戲作一絕

送歐陽季默赴闕

用前韻作雪詩留景文

和劉景文見贈

和劉景文雪

次韻送劉景文

以屏山贈歐陽叔弼

新渡寺席上次韻送叔弼

第二卷

詩五十六首

春思且懷吳越山水

次韻陳履常張公龍潭

竹間亭小酌懷叔弼季默

蠟梅一首贈趙景貺

送王竦朝散赴闕

次韻張朝奉仍招晚飲

閣立本職貢圖

次韻王滁州見寄

和趙景貺求東齋榜銘

洞庭春色

送路都曹

次韻陳履常雪中

謝二鮮于以詩文見寄

趙德麟雪中惜梅且餉柑酒二首

和陳傳道雪中觀燈

閱世亭詩贈任仲微

新渡寺送任仲微

送運判朱朝奉入蜀

病中夜讀朱博士詩

趙德麟餞飲湖上舟中對月

贈朱遜之

和趙德麟送陳傳道

上巳游塗山荆山記所見

淮上早發

次韻徐仲車

次韻林子中春日書事見寄

送陳伯脩察院赴闕

送張嘉父長官

西湖成趙德麟見懷次韻

次韻趙德麟見懷絕句

再次韻趙德麟新開西湖

戲謝毛正仲惠茶

雙石

次韻和晁無咎學士相迎

次韻范淳父送秦少章

靈隱前一首贈唐林夫

滕達道挽詞二首

次韻蘇伯固送李孝博奉使

送晁美叔

王文玉挽詞

送芝上人游廬山

送程德林赴真州

谷林堂

杜輿秀才學種松法二首

見徐州張天驥次舊韻

次韻劉景文贈傅曦秀才

遇定國有感

九日次定國韻

召還至都門先寄子由

次韻定國見寄

次韻穎叔穆父從

駕景靈宮

第三卷

詩六十六首

和范子功月石硯屏

次韻純父涵星硯月石風林屏

次韻錢穆父會飲

次韻穆父侍祠郊丘

郊祀慶成詩

和錢穆父蔣穎叔王仲至四首

見和西湖月下聽琴

見和仇池

玉津園

藉田

海神廟不果遷

沐浴僧舍與趙德麟邂逅

次韻王仲至喜雪御筵

以仇池石借王晉卿

次天字韻答岑巖起

石塔寺

次韻蔣穎叔二首扈從景靈宮

凝祥池

和叔盎畫馬次韻

王晉卿欲奪海石復次前韻

以石易畫晉卿難之復次韻

謝劉景文以畫松鶴為壽

謝程德孺惠海中柏石

次秦少游韻贈姚安世 次丹元姚先生韻

次韻元日立春三首

上元侍飲樓上三首 送蔣穎叔帥熙河

再送二首 次韻穎叔觀燈

王晉卿奉詔押高麗燕射

次韻同賞田曹梅花

送襄陽從事李友諒歸錢塘

次韻吳傳正枯木歌

送黃師是赴兩浙憲

送范中濟經略侍郎得先字

書晁說之考牧圖後 呂與叔學士挽詞

次韻丹元子 書丹元子寧極齋

種穉栝禮曹北垣下

次韻錢穆父寄蔣穎叔二首

表弟程德孺生日

汶公乞詩復用前韻

吳子野出家贈以扇山枕屏

東府雨中別子由

送王敏仲北使

書丹元子所示李太白真

次韻曾仲錫食蜜漬生荔枝

大行太皇太后挽詞二首

再和曾仲錫荔枝

次韻滕大夫三首

雪浪石

同前

沉香石

石芝

鶴歎

送曾仲錫通判如京師

和錢穆父送別并求頓遞酒

第四卷 詩七十首

劉醜廝詩

題毛女真

寄鎰合刷餅與子由

次韻子由清汶老龍珠丹

書清汶老所傳秦湘二女圖

紫團參寄王定國

次韻劉燾撫句蜜漬荔枝

立春日小集呈李端叔

次韻曾仲錫元日見寄

以檀香觀音為子由生日壽

送翟安常赴闕兼寄子由

中山松醪寄雄守王引進

次韻李端叔鴛鴦竹石圖

次韻聰上人見寄

次韻王雄州還朝留別

三月二十日多葉杏盛開

三月二十日開園二首

次韻王雄州送侍其涇州

臨城道中作

過湯陰市得豌豆大麥粥

子由新脩龍興寺吳畫壁

過高郵寄孫君孚

見長蘆天禪師三絕

泊金陵阻風得鍾山泉公書

贈清涼寺和長老 億中和堂

慈湖夾阻風五首 過廬山下

壺中九華 江西

秧馬歌 初入贛過惶恐灘

鬱孤臺 廉泉

塵外亭

天竺寺

過大庾嶺

宿建封寺二首

月華寺

南華寺

碧落洞

峽山寺

舟行至清遠縣見顧秀才

廣州蒲澗寺

贈蒲澗信長老

發廣州

浴日亭

游羅浮山

初到惠州

寓居合江樓

白水山佛迹巖

詠湯泉

自笑

朝雲

寄虎兒

松風亭下梅花盛開

再用前韻

新釀桂酒

惠守詹君見和復次韻

花落復次前韻

第五卷

詩六十七首

江郊

詹守攜酒見過

寄鄧道士

上元夜

游羅浮道院及栖禪精舍

與數客野步求觀林氏花

龍尾石硯寄猶子遠

贈王子直秀才

珍做宋版印

次韻程正輔江行見桃花

追錢正輔至博羅賦詩為別

再用前韻賦

真一酒

游博羅香積寺

次韻定慧欽長老見寄八首

攜白酒鱸魚過詹史君

江漲用過韻

連雨江漲二首

初食荔支

桄榔杖寄張文潛

答周循州

次韻程正輔游碧落洞

酒醒步月理髮而寢

荔支歎

江月五首

聞正輔表兄將至以詩迎之

再和

同正輔表兄游白水山

與正輔游香積寺

次韻正輔同游白水山

次韻子瞻兄月中梳頭

和

夢與人論神仙道術

章質夫送酒書至而酒不達

小圃五詠人參

地黃

枸杞

甘菊

薏苡

雨後行菜

殘臘獨出二首

新年五首

過逍遙堂何道士宗一問疾

食荔支二首

次韻劉湜峽山寺見寄

和子由石菖蒲忽生九花

遷居

兩橋詩東新橋 西新橋

悼朝雲

第六卷

詩六十七首

丙子重九二首

夜過西鄰翟秀才二首

次韻子由所居六詠

吳子野絕粒不睡

次韻惠循二守相會

又次韻二守同訪新居二首

循守臨行出小鬟復用前韻

種茶

鑿井遇磐石石盡得泉

二月二十九日二首

謫海南作詩示子由

夢中得句覺而遇清風急雨

次前韻寄子由

安期生

夜夢

遷居之夕聞隣舍兒誦書

聞子由瘦

客俎無肉又子由勸不讀書

宥老楮

觀棋

糴米

入寺

次韻子由二首東亭

東樓

椰子冠

次韻子由月季花再生

次韻子由浴罷

借前韻賀子由生第四孫

獨覺

夜坐達曉寄子由

謫居三適日起理髮

午窗坐睡

夜臥濯足

子由生日

黃子木柱杖為子由生日壽

得邁寄書酒用過韻寄子姪

上元過赴儋守召獨坐有感

上巳與老符秀才飲

新居

五色雀

倦夜

用過韻冬至與諸生飲酒

縱筆二首

貧家淨掃地

次韻贈吳子野先生二絕

被酒獨行三首

夜燒松明火

聞黃河已復北流

天門冬酒熟二首

追和戊寅歲上元

題過所畫枯木竹石

真一酒歌

第七卷

詩八十九首

汲江煎茶

烏觜

澄邁驛通潮閣二首

洞酌亭詩

六月二十日夜渡海

自雷適廉宿淨行院

廉州龍眼

合浦愈上人訪道南嶽

梅聖俞茅庵

歐陽晦夫惠琴枕

留別廉守

餅筍詩

歐陽晦夫遺接羅琴枕

次韻王鬱林

藤州江上夜起對月

東山浮金堂戲作

鮮于都曹歸蜀

送邵道士彥肅還都嶠

書韓幹二馬

將至廣州寄邁迨二子

贈鄭清叟秀才

和孫叔靜兄弟

廣倅蕭大夫借前韻

王進叔所藏畫跋尾五首 徐熙杏花 趙昌四季

芍藥 躑躅 寒菊 山茶

和黃秀才鑿空閣 韋偃牧馬圖

題靈峯寺壁 衆妙堂

題馮通直明月湖詩 次韻鄭介夫二首

九江與蘇伯固唱和 次韻韶守狄大夫

次韻韶倅李通直二首 李伯時畫舊宅圖

狄韶州煮蔓菁蘆菹羹 贈嶺上老人

贈龍光長老 龍泉鐘上次前韻

贈嶺上梅 留題顯聖寺

過嶺二首 乞數珠

過田氏水閣留題 鬱孤臺再過虔州和前韻

虔守霍大夫復次前韻 贈虔州術士謝君

虔州景德寺榮師湛然堂 和陽行先

用數珠韻贈湜長老 和猶子遲韻贈孫志舉

作六蟲篇答南禪長老

重賦數珠督南禪和詩二首

用前韻再和霍大夫

用前韻再和許朝奉

用前韻再和孫志舉

崔文學申攜文見過

呂承奉讀書作詩不已貧甚

畫車詩二首

贛上留別王子直

次韻江晦叔二首

次韻江晦叔兼呈器之

寒食與器之游寂照堂

戲語器之同參玉板長老

清都觀謝道士求詩

贈詩僧道通

張競辰永康所居萬卷堂

劉壯輿長官是是堂

和壺中九華詩韻

次韻郭功甫二首

次韻法芝舉舊詩

次舊韻贈清涼長老

聞米元章到送麥門冬飲子

夢中作寄朱行中

答徑山琳長老

第八卷

詩一首

何公橋詩

賦八首

黠鼠賦

洞庭春色賦

沉香山子賦

濁醪有妙理賦

琴操一首

醉翁操

辭二首

王大年哀辭

頌一首

桂酒頌

銘八首

四達齋銘

德威堂銘

雪浪齋銘

潛珍閣銘

第九卷

硯銘十一首

丹石硯銘

端石硯銘二首

秋陽賦

中山松醪賦

酒子賦

天慶觀乳泉賦

鍾子翼哀辭

擇勝亭銘

洗玉池銘

漢鼎銘

九成臺銘

王仲儀硯銘

黃魯直銅雀硯銘

陳公密子石硯銘

龍尾石月硯銘

邁硯銘

迨硯銘

卯硯銘

唐陸魯望硯銘

贊八首

九馬圖贊

黃初平牧羊圖贊

二疎圖贊

延州來季子贊

偃松屏贊

三馬圖贊

李潭六馬圖贊

李端叔真贊

雜文十六首

太息一首

書王奧所藏 太宗御書後

送錢塘僧思聰歸孤山敘

書諸公送周梓州詩後 趙德麟字說

書杜輿子師字說後 書東臯子傳後

書黃子思詩集後 外曾祖程公逸事

藥誦 補龍山文二首

東坡酒經 書柳子厚牛賦後

剛說 續養生論

第十卷

秘閣試論六首

王者不治夷狄論

劉愷丁鴻孰賢論

禮義信足以成德論

形勢不如德論

禮以養人為本論

既醉備五福論

御試制科策一道

擬進士對御試策一道并引狀

第十一卷

志林十三首

第十二卷

表狀劄子

辭免翰林學士承旨狀三首

乞候坤成節上壽訖復遂前請狀

謝宣召入學士院狀二首

謝賜對衣金帶馬狀二首

笏記二首

辭免兼侍讀劄子

謝兼侍讀表二首

謝三伏早休表二首

謝除龍圖閣學士知潁州表二首

謝賜對衣金帶馬狀二首

潁州謝到任表二首

賀德音表二首

賀興龍節表

賀駕幸太學表二首

謝賜曆日表二首

揚州謝到任表二首

謝賜卹刑詔書表二首

賀立皇后表二首

賀坤成節表

第十三卷

表狀劄子

謝除兵部尚書賜對衣金帶馬狀二首

謝兼侍讀表二首

進郊祀慶成詩表

任兵部尚書乞外郡劄子

辭兩職并乞郡劄子二首

謝除兩職守禮部尚書表二首

謝賜對衣金帶馬狀二首

笏記二首

定州謝到任表

慰正日表

謝賜曆日表

慰宣仁聖烈皇后山陵禮畢表

慰宣仁聖烈皇后祔廟禮畢表

謝賜衣襖表

到惠州謝表

到昌化軍謝表

提舉玉局觀謝表

疏文

興龍節功德疏文五首

坤成節功德疏文七首

太皇太后本命歲功德疏文

景靈宮祈福道場功德疏文

第十四卷

啓

答杭州交代啓

答館職啓

穎州到任謝執政啓

與京西運使劉昱啓

揚州到任謝執政啓

答晁發運及謝諸郡啓

賀彭發運啓

答杜侍郎啓

定州到任謝執政啓

謝本路監司啓

謝諸郡啓

賀鄰帥及監司冬至啓

賀鄰帥及監司正日啓

答丁連州啓

答陳提刑啓

答彭賀州啓

答王承議啓

答王幼安宣德啓

書

杭州上執政書二首

揚州上呂相書

答虔侔俞括奉議書

答王庠書

答潮州吳秀才書

答謝民師書

答劉沔都曹書

第十五卷

記

衆妙堂記

瓊州惠通井記

南安軍學記

順濟王廟新獲石碣記

碑

上清儲祥宮碑

昭靈侯廟碑

潮州韓文公廟碑

峻靈王廟碑

伏波將軍廟碑

第十六卷

傳

率子廉傳

祝文

潁州謁文宣王廟祝文

謁諸廟祝文

德音到州祭諸廟祝文

祈雨迎張龍公祝文

送張龍公祝文

立春祭土牛祝文

謝晴祝文

祈雨僧伽塔祝文

定州謁諸廟祝文

謁文宣王廟祝文

北嶽祈雨祝文

立春祭土牛祝文

春祈北嶽祝文

春祈諸廟祝文

祈雨諸廟祝文

定州辭諸廟祝文

祭文

祭大覺禪師文

祭歐陽文忠公文

祭張文定公文三首

祭龍井辯才文

祭亡妻同安郡君文

祭韓忠獻公文

大行太皇太后靈駕發引文

祭滕大夫母楊夫人文

惠州祭枯骨文

祭亡妹德化縣君文

祭柳仲遠文二首

祭吳子野文

第十七卷

墓誌

張文定公墓誌銘

第十八卷

墓誌

故龍圖閣學士滕公墓誌銘

王子立墓誌銘

寶月大師塔銘

陸道士墓誌銘

惠州官葬暴骨銘

神道碑

趙康靖公神道碑

第十九卷

釋教五十首

請淨慈法涌禪師入都疏

捨銅龜子文

書若達所書經後

重請戒長老住石塔疏

書孫元忠所書華嚴經後

觀音贊

羅漢贊十六首

水陸法像贊十六首

釋迦文佛頌

僧迦贊

阿彌陀佛贊

無名和尚頌觀音偈

無名和尚傳贊

蘇程庵銘

思無邪齋銘

虔州崇慶禪院新經藏記

書柳子厚大鑒禪師碑後

書金光明經後

金剛經跋尾

廣州東莞縣資福寺舍利塔銘

第二十卷

釋教二十五首

海月辯公直贊

夢齋銘

珍做宋版印

十八大阿羅漢頌各一首

藥師琉璃光佛贊

廣州資福寺羅漢閣碑

靜安縣君許氏繡觀音贊

繡佛贊

東莞資福堂老柏再生贊

補禪月羅漢贊九首

談妙齋銘

南華長老重辯師逸事

南華長老題名記

南安軍常樂院新作經藏銘

靈感觀音偈

湜長老真贊

清隱堂銘

觀世音菩薩頌

東坡後集目錄

東坡後集卷第一

詩六十四首

次韻劉景文西湖席上一首

二老長身屹兩峯常撞大呂應黃鍾將辭鄴下劉公
幹却見雲間陸士龍白髮憐君略相似青山許我定
相從吾今官已六百石慚愧當年邴曼容

次前韻答馬忠玉一首

坡陀巨麓起連峯積累當年慶自鍾靈運子孫俱得
鳳慈明兄弟孰非龍河梁會作看雲別詩社何妨載
酒從祇有西湖似西子故應宛轉爲君容

予去杭十六年而復來留二年而去平生
自覺出處老少粗似樂天雖才名相遠而
安分寡求亦庶幾焉二月六日來別南北
山諸道人而下天竺惠淨師以醜石贈行
作三絕句

當年衫鬢兩青青強說重臨慰別情衰髮祇今無可
白故應相對話來生

出處依稀似樂天敢將衰朽較前賢便從洛社休官
去猶有閑居二十年

在郡依前六百日山中不記幾回來還將天竺一一峯

去欲把雲根到處栽

次韻答黃安中兼簡林子中

老去心灰不復然一麾江海意方堅那堪黃散付子
度空羨杭蘇養樂天病肺一春難白酒別腸三夜遶
朱絃羣仙政欲吾歸去共把清風借玉川

留別蹇道士拱辰

黑月在濁水何曾不清明寸田滿荆棘梨棗無從生
何時反吾真歲月今崢嶸屢接方外士早知俗緣輕
庚桑託雞鶻未肯化南榮晚識此道師似有宿世情
笑指北山雲詞我不歸耕仙人漢陰馬微服方地行
咫尺不往見煩子通姓名願持空手去獨控橫江鯨

次韻子由書王晉卿畫山水二首

老去君空見畫夢中我亦曾遊桃花縱落誰見水到
人間伏流

山人昔與雲俱出俗駕今隨水不回賴我胸中有佳
處一樽時對畫圖開

又書王晉卿畫四首

山陰陳迹

當年不識此清真強把先生擬季倫等是人間一陳
迹聚蚊金谷本何人

雪谿乘興

谿山雪月兩佳哉賓主談鋒夜轉雷猶言不見戴安道爲問適從何處來

四明狂客

毫端偶集一微塵何處谿山非此身狂客思歸便歸去更求敕賜枉天真

西塞風雨

斜風細雨到來時我本無家何處歸仰看雲天真藉笠旋收江海入蓑衣

破琴詩并引

舊說房琯開元中嘗宰盧氏與道士邢和璞出游過夏口村入廢佛寺坐古松下和璞使人鑿地得甕中所藏婁師德與永禪師書笑謂琯曰頗憶此耶琯因悵然悟前生之爲永師也故人柳子玉寶此畫云是唐本宋復古所臨者元祐六年三月十九日子自杭州還朝宿吳松江夢長老仲殊挾琴過予彈之有異聲就視琴頗損而有十三絃予方歎惜不已殊曰雖損尚可修曰柰十三絃何殊不答誦詩云度數形名本偶然破琴今有十三絃此生若遇邢和璞方信秦箏是響泉予夢中了然識其所謂旣覺而忘之明日

晝寢復夢殊來理前語再誦其詩方驚覺而殊適至
意其非夢也問之殊蓋不知是歲六月見子玉之子
子文京師求得其畫乃作詩并書所夢其上子玉名
瑾善作詩及行草書復古名迪畫山水草木蓋妙絕
一時仲殊本書生棄家學佛通脫無所着皆奇士也
破琴雖未修中有琴意足誰云十三絃音節如佩玉
新琴空高張絲聲不附木宛然七絃箏動與世好逐
陋矣房次律因循墮流俗懸知董庭蘭不識無絃曲
題王晉卿畫後

醜石半蹲山下虎長松倒臥水中龍試君眼力看多
少數到雲峯第幾重

聽武道士彈賀若

清風終日自開簾涼月今宵肯挂簷琴裏若能知賀
若詩中定合愛陶潛

元祐六年六月自杭州召還汶公館我於
東堂閱舊詩卷次諸公韻二首

半熟黃梁日未斜玉堂陰合手栽花却尋二十年前
味未飯鍾聲已飯茶

夢覺還驚屨響廊故人來炷影前香鬢鬢白盡成何
事一帖空存老遂良法帖中有褚遂良書云卽日遂良鬢髮盡

白

尺一東來喚我歸衰年已迫故山期文章曹植今堪笑却卷波瀾入小詩

次韻子由書王晉卿畫山水一首而晉卿和二首

誤點故教同子敬雜篇真欲擬湯休壠雲寄我山中信雪月追君溪上舟會看飛僊虎頭篋却來顛倒拾遺裘

子美詩云天吳與紫鳳顛倒在短褐

王孫辦作玄真子

細雨斜風不濕鷗此境眼前聊妄想幾人林下是真休我今心似一潭月君已身如萬斛舟看畫題詩雙鶴鬢歸田送老一羊裘明年兼與土龍去萬頃蒼波沒兩鷗

感舊詩并引

嘉祐中子與子由同舉制策寓居懷遠驛時年二

十六而子由二十三耳一日秋風起雨作中夜條然

始有感槩離合之意自爾宦游四方不相見者十常

七八每夏秋之交風雨作木落草衰輒悽然有此感

蓋三十年矣元豐中謫居黃岡而子由亦貶筠州嘗

作詩以記其事元祐六年子自杭州召還寓居子由

東府數月復出領汝陰時子年五十六矣乃作詩留

別子由而去

床頭枕馳道雙闕夜未央車轂鳴枕中客夢安得長
新秋入梧葉風雨驚洞房獨行殘月影悵焉感初涼
筮仕記懷遠謫居念黃岡一往三十年此懷未始忘
扣門呼阿同子由一字同叔安寢已太康青山映華髮
歸計三月糧我欲自汝陰徑上潼江章想見冰槃中
石蜜與柿霜子欲請東川而歸一物皆東川所出憐子遇
明主憂患已再嘗報國何時畢我心久已降

西湖秋涸東池魚窘甚因會客呼網師遷
之西池爲一笑之樂夜歸被酒不能寐戲
作放魚一首

東池浮萍半粘塊裂碧跳青出魚背西池秋水尚涵
空舞闊搖深吹荇帶吾僚有意爲遷居老守縱饒那
忍膾縱橫爭看銀刀出瀟灑初驚玉花碎但愁數罟
損鱗鬣未信長堤隔濤瀨濺濺發發須臾間圍圍洋
洋尋丈外安知中無蛟龍種尚恐或有風雲會明年
春水漲西湖好去相忘渺淮海

復次放魚前韻答趙承議陳教授

擾擾萬生同大塊搶榆不羨培風背青丘已吞雲夢
芥黃河復繚天門帶長譏韓子隘且陋一飽鯨魚何

足膾東坡也是可憐人披挾泥沙收細碎逝將歸修
入節灘又欲往釣七里瀨正似此魚逃網中未與造
物游數外且將新句調二子湖上秋高風月會爲君
更喚木腸兒脚扣兩舷歌小海

九月十五日觀月聽琴西湖一首示坐客

白露下衆草碧空卷微雲孤光爲誰來似爲我與君
水天浮四坐河漢落酒樽使我冰雪腸不受麴蘖醺
尚恨琴有絃出魚亂湖紋哀彈本舊曲妙耳非昔聞
良時失俯仰此見寧朝昏懸知一生中道眼無由渾
復次前韻謝趙景貺陳履常見和兼簡歐

叔弼兄弟

能詩李長吉識字楊子雲端能望此府坐獻獲兩君
逝將江湖去浮我五石樽眷焉復少留尚爲世所醺
或勸莫作詩兒輩工織紋朱絃寄三歎未害俗耳聞
共尋兩歐陽伐薪照黃昏是家有甘井汲多終不渾
送歐陽主簿赴官韋城四首

鳳雛驥子曰相高白髮蒼顏笑我曹讀遍牙籤二萬
軸却來小邑試牛刀

出處年來恨不齊一樽臨水記分攜江湖咫尺吾將
老汝穎東流子却西

白馬津頭春水來白魚猶喜似江淮使君已復水堂
酒更勸重新畫舫齋

道傍垂白定沾巾正似當年綠髮新故國依然喬木
在典刑復見老成人

泛穎一首

我性喜臨水得穎意甚奇到官十日來九日河之湄
吏民笑相語使君老而癡使君實不癡流水有令姿
遶郡十餘里不駛亦不遲上流直而清下流曲而漪
畫船俯明鏡笑問汝爲誰忽然生鱗甲亂我須與眉
散爲百東坡頃刻復在茲此豈水薄相與我相娛嬉
聲色與臭味顛倒眩小兒等是兒戲物水中少磷淄
趙陳兩歐陽同參天人師觀妙各有得共賦泛穎詩

六觀堂老人草書詩一首

物生有象象乃滋夢幻無根成斯須方其夢時了非
無泡影一失俯仰殊清露未晞電已徂此滅滅盡乃
真吾云如死灰實不枯逢場作戲三昧俱化身爲醫
忘其軀草書非學聊自娛落筆已喚周越奴蒼鼠奮
髯飲松腴剡藤玉板開雪膚遊龍天飛萬人呼莫作
羞澁羊氏姝六觀取金剛經夢幻等六物也老人惜了性精於醫
而金章草書下筆有遠韻而入莫知貴故作此詩

次韻劉景文見寄一首

淮上東來雙鯉魚，巧將詩信渡江湖。絀看落墨皆松瘦，想見掀髯正鶴孤。烈士家風安用此，書生習氣未能無。莫因老驥思千里，醉後哀歌缺唾壺。

次韻趙景貺督兩歐陽詩破陳酒戒一首

商也哀未散歲月，忽已秋祥琴雖未調。餘悲不敢留矧此，乃韻語未入金石流。羲之生五之總角，出銀鉤。吾家有二許，下筆兩不休。君言不能詩，此語人信不。千鍾斯為堯百榼，斯為丘。陋矣陶士衡，當以太白浮。酒中那有失醉則，不驚鷗。明當罰二子，已洗兩玉舟。

首

我本畏酒人，臨觴未常訴。平生坐詩窮，得句忍不吐。吐酒茹好詩，肝胃生滓汙。用此較得喪，天豈不足付。吾儕非二物，歲月誰與度。悄悄焉得長，愁為計已大誤。二歐非無詩，恨子不飲故。強為釀一酌，將非作愁具。成言如皎日，援筆當自賦。他年五君詠，山王一時數。臂痛謁告作三絕句示四君子。

公退清閑如致仕，酒餘歡適似還鄉。不妨更有安心病，臥看縈簾一炷香。

心有何求遣病安年來古井不生瀾
祗愁戲瓦閑童子卻作泠泠一水看

小閣低窗臥晏温了然非默亦非言
維摩示病吾真病誰識東坡不二門

到穎未幾公帑已竭齋廚索然戲作數句
我昔在東武吏方謹新書齋空不知春
客至先愁予采杞聊自誑食菊不敢餘
歲月今幾何齒髮日向疎幸此一郡老
依然十年初夢飲本來空真飽竟亦虛
尚有赤腳婢能烹頰尾魚心知皆夢耳
慎勿歌歸歟景貺履常屢有詩督叔弼
季默唱和已許諾矣復以此句挑之

君家文律冠西京旋築詩壇按酒兵
袖手莫輕真將種致師須得老門生
明朝鄭伯降誰受昨夜條侯壁已驚
從此醉翁天下樂還應一舉百觴傾
文忠公贈蘇梅詩云我亦願助勇鼓旗謀其旁快哉天下樂一釂宜百觴

贈月長老一首

天形倚一笠地水轉兩輪五霸之所連
毫端栖一塵功名半幅紙兒女浪苦辛
子有折足鎗中容五合陳十年此中過
却是英特人延我地爐坐語軟意甚真
白灰如積雪中紅騏驎勿觸紅騏驎作
灰維那瞋

拱手但默坐牆壁方諄諄今宵恨客多汗子白氈巾
後夜當獨來不煩主與賓蒲團坐紙帳自要觀我身

次韻答錢穆父以軾得汝陰用杭越唱酬
韻作詩見寄一首

大耿疲勞已離羣小馮慈愛且當門軾本以舍弟親嫌請
郡玉堂不著扶犁手霜鬢偏宜畫鹿轡豪傑雖無兩
王繼子直深父風流猶有二歐存叔弼季默清詩已入新
歌舞要使邦人識雅言

韓退之之孟郊墓銘云以昌其詩舉此問王
定國當昌其身耶昌其詩也來詩下語未
契作此答之

昌身如飽腹飽盡還當飢昌詩如膏面爲人作容姿
不如昌其氣鬱鬱老不衰雖云老不衰劫壞安所之
不如昌其志志一氣自隨養之塞天地孟軻不吾欺
人言魏勃勇股栗向小兒何如魯連子談笑却秦師
慎勿怨謗讒乃我得道資淤泥生蓮華糞壤出菌芝
賴此善知識使我枯生萸吾言豈須多冷暖子自知
送歐陽推官赴華州監酒

我觀文忠公四子皆超越仲也珠徑寸照夜光如月
好詩真脫兔下筆先落鷗知音如周郎議論亦英發

文章乃餘事學道探玄窟死爲長白主名字書絳闕
熙甯之末仲純父見僕於京城之東曰吾夢道士持告身授吾曰上
帝命汝爲長白山主此何祥也明年仲純父沒傷心清穎尾已
伴白鷗沒喜見三少年俱有千里骨千里不難到莫
遣歷塊蹶臨分出苦語願子書之笏

十月十四日以病在告獨酌一首

翠柏不知秋空庭失搖落幽人得佳蔭露坐方獨酌
月華稍澄穆霧氣尤清薄小兒亦何知相語翁正樂
銅爐燒柏子石鼎煮山藥一盃賞月露萬象紛醺酢
此生獨何幸風纜欣初泊逝逃顏蹠網行赴松喬約
莫嫌風有待漫欲戲寥廓泠然心境空髣髴來笙鶴
獨酌試藥玉滑殘有懷諸君子明日望夜
月庭佳景不可失作詩招之一首

鎔鈇煑白石作玉真自欺琢削爲酒盃規摹定州瓷
荷心雖淺狹鏡面良渺瀰持此壽佳客到手不容辭
曹侯天下平定國豈其師一飲至數石温克頗似之
風流越王孫詩酒屢出奇喜我有此客玉盃不徒施
請君詰歐陳問疾來何遲呼兒掃月榭扶病及良時
歐季默以油煙墨二丸見餉各長寸許戲

作小詩

書窗拾輕煤佛帳掃餘馥辛勤破千夜收此一寸玉
癡人畏老死腐朽同草木欲將東山松涅槃盡南山竹
墨堅人苦脆未用歎不足且當注蟲魚莫草三千牘
明日復以大魚爲餽重二十斤且求詩故
復戲之

漢庭九尺人誰似老方朔那將一寸金令足三冬學
餉魚欲自洗鱗尾光卓犖我是騎鯨手聊堪充鹿角
和趙景貺栽檜

汝陰多老檜處處屯蒼雲地連丹砂井物化青牛君
時有再生枝穎之靈壇觀亦有再生檜還作左紐紋王孫
有古意書室延清芬應憐四孺子不墮凡木羣體備
松柏姿氣含芝朮薰初扶鶴立骨未出龍纏筋巢根
白蟻亂網葉秋蟲紛乃知蔽芾初甚要封植勤他年
皮三寸狐鼠了不聞

葉待制求先墳永慕亭詩一首

靈區有異產化國無潛珍承平百年間簪纓半齊民
建溪富奇偉葉氏初隱淪森然見喬木其下維德人
佳哉鬱葱葱氣若鳳與麟聯翩出儒將豈惟十朱輪
新松無鹿觸舊柏有烏馴待公歸上冢淚葉乃肯春
與趙陳同過歐陽叔弼新治小齋戲作一

江湖渺故國風雨傾舊廬東來三十年愧此一束書
尺椽亦何有而我常客居羨君開此室容膝真之餘
拊床琴動搖弄筆窗明虛後夜龍作雨天明雪填渠
時方禱雨龍祠作此句時星斗燦然四更風雨大至明日乃雪夢回
聞剝啄誰乎趙陳予添丁走沽酒通德起挽蔬主孟
當啗我玉鱗金尾魚一醉忘其家此身自蘧蔭

聚星堂雪一首并敘

元祐六年十一月一日禱雨張龍公得小雪與客會
飲聚星堂忽憶歐陽文忠公作守時雪中約客賦詩
禁體物語於艱難中特出奇麗爾來四十餘年莫有
繼者僕以老門生繼公後雖不足追配先生而賓客
之美殆不減當時公之二子又適在郡故輒舉前令
各賦一篇

窗前暗響鳴枯葉龍公試手行初雪映空先集疑有
無作態斜飛正愁絕衆賓起舞風竹亂老守先醉霜
松折恨無翠袖點橫斜祇有微燈照明滅歸來尚喜
更鼓暗晨起不待鈴索掣未嫌長夜作衣稜却怕初
陽生眼纈欲浮大白追餘賞幸有回飈驚落屑模糊
檜頂獨多時歷亂瓦溝裁一瞥汝南先賢有故事醉

翁詩話誰續說當時號令君聽取百戰不許持寸鐵
歐陽叔弼見訪誦陶淵明事歎其絕識叔
弼既去感槩不已而賦此詩

淵明求縣令本緣食不足束帶向督郵小屈未爲辱
翻然賦歸去豈不念窮獨重以五斗米折腰營口腹
云何元相國萬鍾不滿欲胡椒銖兩多安用八百斛
以此殺其身何翅抵鵲玉往者不可悔吾其反自燭
喜劉景文至一首

天明小兒更平傳呼髯劉已到城南隅尺書真是髯
手迹起坐慰眼知有無今人不作古人事今世有此
古丈夫我聞其來喜欲舞病自能起不用扶江淮旱
久塵土惡朝來清雨濯鬢鬚相看握手了無事千里
一笑無乃迂平生所樂在吳會老死欲葬杭與蘇過
江西來二百日冷落山水愁吳姝新堤舊井各無恙
參寥六一豈念吾別後新詩巧摹寫袖中知有錢塘
湖

禱雨龍公既應劉景文有詩次韻

張公晚爲龍抑自龍中來伊昔風雲會咄嗟潭洞開
精誠苟可貫賓主真相陪洞簫振羽舞白酒浮雲壘
言從關洲妃遠去焦氏臺倒傾瓶中雨一洗麥上埃

破旱不論功乘雲却空回嗟龍與我輩用意豈遠哉
使君今子義英風冠東萊笑說龍爲友幽明莫相猜
劉景文家藏樂天身心問答三首戲書一
絕其後

淵明形神自我樂天身心相物而今月下三人他日
當成幾佛

西湖戲作一絕

一士千金未易償我從陳趙兩歐陽舉鞭拍手笑山
簡祇有并兒一葛強

送歐陽季默赴闕一首

先生豈止一懷祖郎君不減王文度膝上幾日今白
鬚令我眼中見此父汝南相從三晦朔君去苦早我
來莫霜風淒緊正脫木穎水清淺可立鷺莫辭白酒
瀉香泉已覺扁舟掠新渡坐看士衡執別手更遣夢
得出奇句郎君可是筦庫人乃使驥驟隨蹇步置之
行矣無足道賢愚豈在遇不遇

用前韻作雪詩留景文一首

萬松嶺上黃千葉載酒年年踏松雪劉郎去後誰復
來花下有人心斷絕東齋夜坐搜雪句兩手龜折霜
須折無情豈亦畏嘲弄穿簾入戶吹燈滅紛紛兒女

爭所似碧海長鯨君未掣朝來雲漢接天流顧我小
詩如點纈歐陽趙陳在戶外急掃中庭鋪木屑交遊
雖似雪柏堅聚散行作風花瞥晴光融作一尺泥歸
有何事真無說泥乾路穩放君去莫倚馬蹄如踏鐵

和劉景文見贈一首

元龍本志陋曹吳豪氣崢嶸老不除失路今爲噲等
伍作詩猶似建安初西來爲我風驚面獨臥無人雪
縮廬留子非爲十日飲要令安世誦亡書

和劉景文雪

占雨又得雪龜寧欺我哉似知吾輩喜故及醉中來
童子愁冰硯佳人苦膠盃那堪李常侍入蔡夜銜枚

次前韻送劉景文一首

白雲在天不可呼明月豈肯留庭隅怪君西行八百
里清坐十日一事無路人不識呼尚書但見凜凜雄
千夫君一馬兩僕率然相訪逆旅多呼尚書意謂君都頭也豈知

入骨愛詩酒醉倒正欲蛾眉扶一篇向人寫肝肺四
海知我霜鬢鬚君前有詩見寄云四海共知霜鬢滿重陽曾插

菊花無歐陽趙陳皆我有豈謂夫子駕復迂爾來又

見三黜柳共此暖熱殮甑蘇酒肴酸薄紅粉暗祇有
穎水清而姝一朝寂寞風雨散對影誰念月與吾郡

中日與歐陽叔弼趙景貺陳履常相從而景又復至不數日柳戒之亦見過賓客之盛頃所未有然不數日叔弼景又戒之皆去矣何時歸帆泝江水春酒一變甘棠湖景又近卜居九江近甘棠湖

以屏山贈歐陽叔弼一首

漫郎天骨清生與世俗異學道新有得爲貧聊復仕每於紅塵中常起青霞志屏山輟贈子莫遣汗簪珥寓目紫翠間安眠本非睡夢中化爲鶴飛入長松寺

新渡寺席上次趙景貺陳履常韻送歐陽叔弼比來諸君唱和叔弼但袖手旁睨而已臨別忽出一篇頗有淵明風製坐皆驚歎

神屠不目全妙頗惟粧半更刀乃扶庖倚市必醜悍平生魏公籌忽斲郢人墁詩書亦何用適道須此館多言雖數窮微中或排難子詩如清風瑟瑟發將旦胡爲久閉匿綺語真自患許時笑我癡隔屋相咏歎竟識彥道否絕叫呼百萬清朝固多士入門子皆冠莫言清潁水從此隔河漢異時我獨來得魚楊柳貫持歸不忍食尺素解悽斷中有清圓句銅丸飛柘彈春愁結凌澌正待一笑泮百篇儻寄我呻吟鄭人緩

東坡後集卷第二

詩五十六首

次韻趙景貺春思且懷吳越山水一首

歲華來無窮老眼久已靜春風如繫馬未動意先騁
西湖忽破碎鳥落魚動鏡縈城理枯瀆放聞起膠艇
願君營此樂宦事何時竟清河西湖三閘督君成之思吳
信偶然出處付前定飄然不繫舟乘此無盡興醉翁
行樂處草木皆可敬明朝游北渚急掃黃葉徑白酒
直到齊紅裙已放鄭酒尚有香泉一壺為樂全先生服不作樂
也

次韻陳履常張公龍潭一首

經明宣城宰家此百尺瀾鄭翁不量力敢以非意干
玄黃雜兩戰絳青表雙蟠事見龍公碑烈氣斃強敵仁
心惻飢寒精誠禱必赴苟簡求亦難蕭條麥麩枯浩
蕩日月寬念子無吏責十日勤征鞍春蔬得雨雪少
助先生槃龍不憚往來而我獨宴安閉閣默自責神
交清夜闌

竹間亭小酌懷歐陽叔弼季默呈趙景貺
陳履常一首

歲莫自急景我閑方緩觴醉餘西湖晚步轉北渚長

地坐略少長意行無濶岡久知薺麥青稍喜榆柳黃
盎盎春欲動潏潏夜未央水天鷗鷺靜月霧松檜香
撫景方婉婉懷人重淒涼豈無一老兵坐念兩歐陽
我意正麋鹿君才亦圭璋此會恐難久此歡不可忘

蠟梅一首贈趙景貺

天工點酥作梅花此有蠟梅禪老家蜜蜂採花作黃
蠟取蠟爲花亦其物天工變化誰得知我亦兒嬉作
小詩君不見萬松嶺上黃千葉玉藥檀心兩奇絕醉
中不覺度千山夜聞梅香失醉眠歸來却夢尋花去
夢裏花仙覓奇句此間風物屬詩人我老不飲當付
君君行適吳我適越笑指西湖作衣鉢

送王竦朝散赴闕

我家衡山公清而畏人知臧否不出口默識如著龜
擢子拱把中云有驥騄姿胡爲三十載尚作窮苦詞
丈人不忘語未効此可疑竭來清穎上淚溼中郎詩
怪我一年長而作十年衰同時幾人在豈敢怨白髭
願言指松柏永與霜雪期伯父爲衡州日與君相知有送行

詩

次韻致政張朝奉仍招晚飲

掃白非黃精輕身豈胡麻怪君仁而壽未覺生有涯

曾經丹化米親授棗如瓜雲烝作霧楷火滅嘆兩巴
自此養鉛鼎無窮走河車至今許玉斧猶事萼綠華
君曾見水州何仙姑得藥餌之人疑其以此壽也故有丹化米萼綠華之句皆女仙事 我本三生人疇昔一念差前生或草

聖習氣餘驚蛇儒懼謝赤松佛縛縛慚丹霞時時一篇
出擾擾四座譁清詩得可驚信美詞多夸回車入官
府治具隨貧家萍薤與豆粥亦可成咄嗟

閻立本職貢圖

正觀之德來萬邦浩如滄海吞河江音容儉獮服奇
彪橫絕嶺海逾濤瀧珍禽瑰產爭牽扛名王解辦却
蓋幢粉本遺墨開明窗我喟而作心未降魏徵封倫
恨不雙

次韻王滁州見寄

斯人何似似春雨歌舞農夫怨行路君看永叔與元
之坎軻一生遭口語兩翁當年鬢未絲玉堂揮翰手
如飛教得滁人解吟詠至今里巷嘲輕肥君家聯翩
盡卿相獨來坐獻谿山上笑捐浮利一雞肋多取清
名幾熊掌丈夫自重貴難售兩翁今與青山久後來
太守更風流要伴前人作詩瘦我勸承明苦求出到
處遺蹤尋六一憑君試與問琅耶許我來游莫難色

趙景貺以詩求東齋榜銘昨日聞都下寄
酒來戲和其韻求分一壺作潤筆也

王孫天騏驎眸子奧而澈囊空學愈富屋陋人更傑
我老書益放筆落座爭掣欲求東齋銘要飲西湖雪
長餅分未到小硯乾欲裂不似淳于髡一石要燭滅

洞庭春色一首并引

安定郡王以黃柑釀酒謂之洞庭春色色香味三絕
以餉其猶子德麟德麟以飲予為作此詩醉後信筆
頗有沓拖風氣

二年洞庭秋香霧長嘆手今年洞庭春玉色疑非酒
賢王文字飲醉筆蛟蛇走既醉念君醒遠餉為我壽
餅開香浮座瓊凸光照牖方傾安仁醪潘岳笙賦云披黃苞以授柑傾綠瓷以酌醪莫遣公遠艱明皇食柑凡千餘枚皆闕一瓣問進柑使者云中塗嘗有道士艱之蓋羅公遠也要當

立名字未用問升斗應呼釣詩釣亦號掃愁帚君知
蒲萄惡正是嫫姆黜須君灑海盃澆我談天口

送路都曹一首并引

乖崖公在蜀有錄曹參軍老病廢事公責之曰胡不
歸明日參軍求去且以詩留別其略曰秋光都似宦
情薄山色不如歸意濃公驚謝之曰吾過矣同僚有

詩人而吾不知因留而慰薦之予幼時聞父老言恨
不問其姓名今都曹路君以小疾求致仕予誦此語
留之不可乃探前人意作詩送之并送趙德麟陳履
常各賦一篇

積雪困桃李春心誰爲容淮光釀山色先作歸意濃
我亦倦游者君恩繫疎慵欲留耿介士伴我衰遲
蹤吏課升斗積崎嶇等鈇春那將露電身坐待收千
鍾結髮空百戰市人看先封誰能搔白首抱關望夕
烽子意亮已成我言寧復從恨無乖崖老一洗芥蒂
胸我田荆谿上伏臘亦粗供懷哉江南路會作林下
逢

次韻陳履常雪中一首

可憐擾擾雪中人飢飽終同寓一塵老檜作花真強
項凍鳶儲肉巧謀身忍寒吟咏君堪笑得煖謹呼我
未貧坐聽屐聲知有路擁裘來看玉梅春

二鮮于君以詩文見寄作詩爲謝

我懷元祐初珪璋滿清班維時南隆老奉使獨未還
迂叟向我言青齊歲方艱斯人乃德星遣出虛危間
司馬溫公謂軾曰子駿福星也京東人困甚且令往彼
召用旣晚矣天命良復慳一朝失老驥寂寞空帝閑至今清夜

夢枕衾有餘潛喜聞二三子結髮師閔顏高論已河漢
漢清詩鳴珮環遙知三日雪積玉埋崧山誰念此幽
桂坐蒙榛與管故人在頴尾投詩清泠灣

次韻趙德麟雪中惜梅且餉柑酒三首

千花未分出梅餘遣雪摧殘計已疎臥聞點滴如秋
雨知是東風爲掃除

閨苑千葩映玉宸人間祇有此花新飛翼要欲先桃
李散作千林火迫春

蹀躞嬌黃不受鞦東風暗與色香歸偶逢白墮爭春
手遣入王孫玉學飛

和陳傳道雪中觀燈

新年樂事歎何曾閉閣燒香一病僧未忍便傾澆別
酒且來同看照愁燈穎魚躍處新亭近湖雪消時畫
舫升祇恐樽前無此客清詩還有士龍能

閱世亭詩贈任仲微

任公鎮西南嘗贈繞朝策當時若盡用善陣無赫赫
淒涼十年後邪正久已白却留封德彝天意眇難測
象賢真驥種號訴甘百謫豈云報私仇禍福指絡脈
高才食舊德但恐里門窄傷心千騎歸贈印黃壤隔
惟有亭前檜閱世不改色千年與并在記此王粲宅

新渡寺送任仲微

春陰欲落雪野氣方升雲我游清潁尾想見翠被君
古來聚散地與子復言分倦游安稅駕瘦田失歸耘
獨宿古寺中荒雞亂鳴羣送子以曉角幽幽醒時聞
送運判朱朝奉入蜀

藹藹青城雲娟娟峨眉月隨我西北來照我光不滅
我在塵土中白雲呼我歸我游江湖上明月溼我衣
岷峨天一方雲月在我側謂是山中人相望了不隔
夢尋西南路默數長短亭似聞嘉陵江跳波吹枕屏
送君無一物清江飲君馬路穿慈竹林父老拜馬下
不用驚走藏使者我友生聽訟如家人細說爲汝評
若逢山中友問我歸何日爲話腰腳輕猶堪踏泉石
病中夜讀朱博士詩

病眼亂燈火細書數塵沙君詩如秋露淨我空中花
古語多妙寄可識不可誇可笑在頰頰哀音餘摻糲
曾坑一掬春紫餅供千家懸知貴公子醉眼無真茶
崎嶇爛石上得此一寸芽緘封勿浪出湯老客未嘉
趙德麟餞飲湖上舟中對月一首

老守惜春意主人留客情官餘閑日月湖上好清明
新火發茶乳溫風散粥錫酒闌紅杏闌日落大堤平

清夜除燈坐孤舟擘岸撐棹君憤未墮對此月猶橫

贈朱遜之并引

元祐六年九月與朱遜之會議于穎或言洛人善接
花歲出新枝而菊品尤多遜之曰菊當以黃為正餘
可鄙也昔叔向聞駸蔑一言知其為人予於遜之亦
云

黃花候秋節遠自夏小正坤裳有正色鞠衣亦令名
一從人偽勝遂與天力爭易性寓非族改顏隨所令
新奇既易售粹駁宜相傾疾惡逢伯厚識真似淵明
君言我所印世論誰改評願君為霜風一掃紫與頰
和趙德麟送陳傳道

二陳既妙士兩歐惟德人王孫乃龍種世有籥雲鱗
五君從我游傾寫出怪珍俗物敗人意茲游實清醇
邨知有聚散佳夢失欠伸我舟下清淮沙水吹玉塵
君行踏曉月疎木挂寸銀尚寄別後詩翦刻淮南春
上巳日與二子迨過游塗山荆山記所見

一首

此生終安歸還軫天下半搗來乘櫟廟復作微禹歎

昔自南河赴杭州過此蓋二十二年矣從祠及彼呱有啓廟

像設偶此粲謂塗山氏秦祖當侑坐謂伯翳夏郊亦薦

裸有絲廟可憐淮海人尚記弧矢日淮南人相傳禹以六月六日生是日數萬人會山上雖傳記不載然相傳如此荆山碧相照楚水清可亂別人有餘坑美石肖温瓚荆山下有木杪出牛乳石池漫龜泉在荆山下色白而甘真陸羽所謂石池漫流者有石記云唐正元中隨白龜流出小兒強好古侍史笑流汗歸時蝙蝠飛炬火記遠岸

淮上早發

澹月傾雲曉角哀小風吹水碧鱗開此生定向江湖老默數淮中十往來

次韻徐仲車一首仲車耳聾

惡衣惡食詩愈好恰似霜松轉春鳥蒼蠅莫亂遠雞聲世上誰如公覺早八年看我走三州元豐八年予赴登州元祐四年赴杭州今赴揚州皆見仲車月自當空水自流人間擾擾真螻蟻應笑人呼作鬪牛

次韻林子中春日新堤書事見寄

東都寄食似孤雲幙被真成一宿賓收得玉堂揮翰手却爲淮月弄舟人羨君湖上齋搖碧笑我花時甑有塵爲報年來殺風景連江夢雨不知春來詩有芍藥春之句揚州近歲率爲此會用花十餘萬枝吏緣爲姦民極病之故

罷此會

送陳伯修察院赴闕

裕陵固天縱筆有雲漢姿嘗重連山象不數秋風辭
龍騰與虎變狸豹復何施我窮真有數文字乃見知
聞君射策日妙語發疇咨一日喧萬口驚倒同舍兒
豈知二十年道路猶遲遲苦言如藥石瞑眩終見思
屈信反覆手獨於君可疑四門方穆穆行矣及此時
送張嘉父長官

都城昔傾蓋駿馬初服軛再見江湖間秋鷹已難韝
于今三會合每進不少留豫章旣可識瑚璉誰當收
微官有民社妙割無雞牛歸來我益敬器博用自周
百年子初筵我已迫旅酬但當記苦語高節貫白頭
軾在穎州與趙德麟同治西湖未成改揚
州三月十六日湖成德麟有詩見懷次韻

一首

太山秋毫兩無窮鉅細本出相形中大千起滅一塵
裏未覺杭穎誰雌雄來詩云與杭爭雄我在錢塘拓湖
淥大堤士女爭昌丰六橋橫絕天漢上北山始與南
屏通忽驚二十五萬丈老葑席卷蒼雲空竭來穎尾
弄秋色一水縈帶昭靈宮坐思吳越不可到借君月

斧修墮隴二十四橋亦何有換此十頃玻璃風雷塘
水乾禾黍滿寶釵耕出餘鸞龍明年詩客來弔古伴
我霜夜號秋蟲德麟見約來揚寄居亦有意求揚倅

次韻趙德麟西湖新成見懷絕句一首

壺中春色謂洞庭春色也飲中仙騎鶴東來獨惘然猶
有趙陳同李郭不妨同泛過湖船

再次韻趙德麟新開西湖一首

使君不用山麴窮飢民自逃泥水中欲將百瀆起凶
歲免使甌石愁揚雄西湖雖小亦西子縈流作態清
而丰千夫餘力起三閘焦陂下與長淮通十年憔悴
塵土窟清瀾一洗啼痕空王孫本自有仙骨平生宿
衛明光宮一行作吏人不識正似雲月初朦朧時臨
此水照冰雪莫遣白髮生秋風定須卻致兩黃鵠新
與上帝開濯龍湖成君歸侍帝側燈花已綴釵頭蟲
予以穎人苦饑奏乞留黃河夫萬人修境內溝洫詔許之因以餘力
浚治此湖

到官病勸未嘗會客毛正仲惠茶乃以端
午小集石塔戲作一詩爲謝

我生亦何須一飽萬想滅胡爲設方丈養此膚寸舌
爾來又衰病過午食輒噎繆爲淮海帥每愧廚傳缺

爨無欲清人奉使免內熱空煩赤泥印遠致紫玉玦
為君伐羔豚歌舞菰黍節禪窗麗午景蜀井出冰雪
坐客皆可人鼎器手自絜金釵候湯眼魚蟹亦應訣
遂令色色香味一日備三絕報君不虛授知我非輕啜

雙石一首并引

至揚州獲二石其一綠色岡巒迤邐有穴達于背其
一玉白可鑿漬以盆水置几案間忽憶在潁州日夢
人請住一官府榜曰仇池覺而誦杜子美詩曰萬古
仇池穴潛通小有天乃戲作小詩為僚友一笑
夢時良是覺時非汲水埋盆故自癡但見玉峯橫太
白便從鳥道絕峨眉秋風與作煙雲意曉日令涵草
木安一點空明是何處老人真欲住仇池

次韻和晁無咎學士相迎一首

少年獨識晁新城閉門卻掃卷旆旌胸中自有談天
口坐卻秦軍發墨守有子不為謀置雖虹霓吞吐忘
寒飢端如太史牛馬走嚴徐不敢連尻雅喪回未用
疑相待枉尺知君有家戒避人聊復去瀛洲伴我真
能老淮海夢中仇池千仞巖便欲攬我青霞幘且須
還家與婦計我本歸路連西南老人飲酒無人佐獨
看紅藥傾白墮每到平山憶醉翁懸知他日君思我

路旁小兒笑相逢齊歌萬事轉頭空賴有風流賢別
駕猶堪十里卷春風

次韻范淳父送秦少章一首

宿緣在江海世網如予何西來庾公塵已濯長淮波
十年淮海人初見一麥禾但欣爭訟少未覺舟車多
秦郎忽過我賦詩如卷阿句法本黃子謂魯直也二豪
與揩磨其兄少游與張文潛嗟我久離羣逝將老西河後
生多名士欲薦空悲歌小范真可人獨肯勤收羅瘦
馬識隸耳枯桐得雲和近聞館李生李薦方叔病鶴借
一柯贈行苦說我妙語慰蹉跎西羌已解仇烽火連
朝那坐籌付公等吾將寄潛沲

靈隱前一首贈唐林夫

靈隱前天竺後兩瀾春淙一靈鷲不知水從何處來
跳波赴壑如奔雷無情有意兩莫測肯向冷泉亭下
相縈回我在錢塘六百日山中暫來不暖席今君欲
作靈隱居葛衣草屨隨僧蔬能與冷泉作主一百日
不用二十四考書中書

滕達道挽詞二首

先帝知公早虛懷第一人至今詩禮將惟數武宣臣
材大雖難用時來亦少信高平風烈在威敏典刑新

公少受知於范希文孫元規空試乘邊策寧留相漢身淒涼舊部曲淚濕塚前麟

雲夢連江雨樊山落木秋公方占賈鵬我正買龔牛
共有江湖樂俱懷畎畝憂荆溪欲歸老浮玉偶同游
骭髀儀刑在驚呼歲月迢回頭雜歌哭挽語不成謳
次韻蘇伯固游蜀岡送李孝博奉使嶺表

新苗未沒鶴老葉方翳蟬綠渠浸麻水白板燒松煙
笑窺有紅頰醉臥皆華顛家家機杼鳴樹樹梨棗懸
野無佩犢子府有騎鶴仙觀風嶠南使出相山東賢
渡江弔很石過嶺酌貪泉與君步徙倚望彼修連娟
願及南枝謝早隨北鴈翩歸來春酒熟共看山櫻然
送晁美叔一首

我年二十無朋儔當時四海一子由君來扣門如有
求願然病鶴清而修醉翁遣我從子游翁如退之蹈
軻丘尚欲放子出一頭嘉祐初軾與子由寓興國浴室美叔

忽見訪云吾從歐陽公游久矣公令我來與子由定交謂子必名世老
夫亦須放他出一頭地酒醒夢斷四十秋病鶴不病骨愈

蚪惟有我顏老可羞醉翁賓客散九州幾人白髮還
相收我如懷祖拙自謀正作尚書已過優君求會稽
實良籌往看萬壑爭交流君近乞越州

王文玉挽詞

才名誰似廣文寒月斧雲斤琢肺肝玄晏一生都臥
病子雲三世不遷官幽蘭空覺香風在宿草何曾淚
葉乾猶喜諸郎有曹志文章還復富波瀾

送芝上人游廬山

二年閱三州我老不自惜團團如磨牛步步踏陳迹
豈知世外人長與魚鳥逸老芝如雲月烟烟時一出
比年三見之常若有所適逝將走廬阜計關道愈密
吾生如寄耳出處誰能必江南千萬峯何處訪子室

送程德林赴真州

君為縣令元豐中吏貪功利以病農君欲言之路無
從移書諫臣以自通陳臣蹇受之也元豐天子為改容
我時疋馬江西東問之逆旅言頗同老人愛君如劉
寵小兒敬君如魯恭爾來明目達四聰收拾駟駿冀
北空君為赤令有古風政聲直入明光宮天廡如海
養羣龍并收其子豈不公君之子祁舉制策文學行義為時
所稱白沙何必煩此翁

谷林堂詩一首

深谷下窈窕高林合扶疎美哉新堂成及此秋風初
我來適過雨物至如娛予穉竹真可人霜節已專車

老槐苦無賴風花欲填渠山鴉爭呼號谿蟬獨清虛
寄懷勞生外得句幽夢餘古今正自同歲月何必書

予少年頗知種松手植數萬株皆中梁柱
矣都梁山中見杜輿秀才求學其法戲贈
二首

露宿泥行草棘中十年春雨養髯龍如今尺五城南
杜欲問東坡學種松

君方掃雪收松子我已開榛得茯苓爲問何如插楊
柳明年飛絮作浮萍

行宿泗間見徐州張天驥次舊韻

二年二躡過淮舟款段還逢馬少游無事不妨長好
飲箸書自要且窮愁孤松早偃元非病倦鳥雖還豈
是休更欲河邊幾來往祇今霜雪已蒙頭

次韻劉景文贈傅曦秀才

窈眇文章宜和寡崢嶸肝肺亦交難未能飛瓦彈清
角肯便投泥戲潑寒忽見秋風吹洛水遙知霜葉滿
長安詩成送與劉夫子莫遣孫郎帳下看

在彭城日與定國爲九日黃樓之會今復
以是日相遇于宋凡十五年憂樂出處有
不可勝言者而定國學道有得百念灰冷

而顏益壯顧予衰病心形俱瘁感之作詩
菊殘萸囊自古傳長房寧復是矐仙應從宋武橫刀
日數到劉公戲馬年對玉山人雖老矣見恆河性故
依然王郎九日詩十首今賦黃樓第二篇

九日次定國韻一首

朝菌無晦朔蟪蛄疑春秋南柯已一世我眠未轉頭
仙人視吾曹何異蜂蟻稠不知蠻觸氏自有兩國憂
我觀去來今未始一念留奔馳竟何得而起無窮羞
王郎誤涉世屢獻久不醺黃金散行樂清詩出窮愁
俛仰四十年始知此生浮軒裳陳道路往往兒童收
封侯起大第或是君家驕似聞負販人中有第一流
炯然徑寸珠藏此百結裘意行無車馬倏忽略九州
邂逅獨見之天與非人謀笑我方醉夢衣冠戲沐猴
力盡病騏驥伎窮老伶優北山有雲根寸田自可耰
會當無何鄉同作逍遙遊歸來城郭是空有纍纍丘
召還至都門先寄子由一首

老身倦馬河堤永踏盡黃榆綠槐影荒雞號月未三
更客夢還家得俄頃歸老江湖無歲月未填溝壑猶
朝請黃門殿中奏事罷詔許來迎先出省已飛青蓋
在河梁定餉黃封兼賜茗遠來無物可相贈一味豐

年說淮穎

次韻定國見寄

還朝如夢中雙闕眩金碧復穿鵝鷺行強寄麋鹿迹
勞生苦晝短展轉不能夕默坐數更鼓流水夜自逆
故人爲我謀此志何由畢越吟知聽否誰念病莊寫
時方請越

次韻蔣穎叔錢穆父從

駕景靈宮二首

歸來病鶴記城闐舊踏松枝雨露新半白不羞垂領
髮軟紅猶戀屬車塵雨收九陌豐登後日麗三二元下
降辰粗識君王爲民意不才何以助精禋前輩戲語有
西湖風月不如東華軟紅香土

與君並直記初元白首還同入禁門玉殿齊班容小
語霜廷稽首泫微温適與穆父並拜廷中地皆流濕相與小語
道之病貪賜茗浮銅葉老怯香泉灑寶樽回首鵝行
有人傑坐知羌虜是游魂

東坡後集卷第一

東坡後集卷第二

詩六十六首

軾近以月石硯屏獻子功中書公復以涵
星硯獻純父侍講子功有詩純父未也復
以月石風林屏贈之謹和子功詩并求純
父數句

紫潭出玄雲翳我潭中星獨有潭上月倒挂紫翠屏
我老不看書默坐養此昏花晴時時一開眼見此雲
月眼自明久知世界一泡影大小真偽何足評笑彼
三子歐蘇梅無事自作雪羽爭事見二人詩集故將屏
硯送兩范要使珠璧栖霞窗櫺大范忽長謠語出月齋
令人驚皇甫湜云穿天心出月齋意外驚人語非尋常小范當
繼之說破星心如雞鳴孟郊聞雞詩云似聞孤月口能說落
星心林頭復一月下有風林橫急送小范家護此涵
星泓願從少陵博一句山木盡與洪濤傾

次韻范純父涵星硯月石風林屏詩一首

月次于房歷三星斗牛不神箕獨靈簸搖桑榆盡西
靡影落蘇子硯與屏天工與我兩厭事孰居無事為
此形與君持橐侍帷幄同到溫室觀堯莫自憐太史
牛馬走技等卜祝均倡伶欲留衣冠挂神武便擊雲

水歸南溟陶泓不稱管城沐醉石可助平泉醒故持
二物與夫子欲使妙質留天庭但令滋液到枯槁勿
遣光景生晦冥上書挂名豈待我獨立自可當雷霆
我時醉眠風林下夜與漁火同青熒撫物懷人應獨
歎作詩寄子誰當聽

次韻錢穆父會飲一首

彈冠恨不早挂冠常苦遲盛服每假寐角闕時伏思
東門未祖道西山空拄頤逝將江海去安此麋鹿姿
要當謀三徑何暇擇一枝與君幾合散得酒忘淳漓
君談似落屑我飲如奕棋世有作詩如奕棋奕棋如飲酒飲
酒乃天戒之語僕此二事皆不能居官不任事造物真見私
主人獨賢勞金穀方流馳行人亦結束杖杜乃歸期
公卿雖少安河流正東醜我得會稽去方回良不癡

次韻穆父尚書侍祠郊丘瞻望

天光退而相慶引滿醉吟一首

千章杞梓蔭雲天樗散誰收老鄭虔喜氣到君浮白
裏豐年及我挂冠前令嚴鐘鼓三更月野宿貔貅萬
竈煙太息何人知帝力歸來金帛看頰肩

郊祀慶成詩一首

帝出乘昌運天心予太平文章三代繼制作七年成

大祀乾坤合剛辰日月明泰壇朝掃地魄寶夜垂精
仰御圓蒼蓋環觀海嶽城北流吞朔易西極落攬槍
升燎靈光答回鑿瑞霧迎需雲徧枯槁解雨達勾萌
可頌非天德因箴亦下情民言知有酌帝謂本無聲
富國由崇儉斬年在好生無心斯格物克己自消兵
化國安新政孤臣反舊耕還將清廟什留與野人賡
次韻奉和錢穆父蔣穎叔王仲至詩四首
見和西湖月下聽琴

謾謾松下風藹藹壠上雲聊將竊比我不堪持寄君
半生寓軒冕一笑當琴尊良辰飲文字晤語無由醺
我有鳳鳴枝背作蛇蚶紋月明委靜照心清得奇聞
當呼玉瀾手一洗羯鼓昏請歌南風曲猶作虞書渾
家有雷琴甚奇古玉瀾道人雀閑妙於雅聲當呼使彈

見和仇池

上窮非想亦非非下與風輪共一癡翠羽若知牛有
角空餅何必井之眉還朝暫接鵝鸞翼謝病行收麋
鹿姿記取和詩三益友他年弭節過仇池

玉津園

承平苑囿雜耕桑六聖勤民計慮長碧水東流還舊
派玉津分藥河上流復合於下紫壇南峙表連岡不逢遲

日鶯花亂空想疎林雪月光千畝何時躬帝藉斜陽
寂歷鎖雲莊

藉田

竊脂方紀瑞布穀未催耕魚沫依蘋渚蝸涎上綵楹
江湖來夢寐蓑笠負平生琴裏思歸曲因君一再行
頃年楊康功使高麗還奏乞立海神廟板
橋僕嫌其地湫隘移書使遷之文登因古
廟而新之楊竟不從不知定國何從見此
書作詩稱道不已僕不復記其云何也次
韻答之

退之仙人也遊戲於斯文談笑出偉奇鼓舞南海神
頃年二韓使幾為鮫鱓吞歸來築祠宇要使百賈奔
板橋商賈所聚 我欲遷其廟下數浮空羣謂登州海市移
書竟不從信非磊落人公胡為拳拳繫此空中雲作
詩頌其美何異刻劍痕我今已括囊象在六四坤

沐浴啓聖僧舍與趙德麟邂逅一首

南山北澗兩非真東穎西湖迹已陳季子來歸初可
喜老聃新沐定非人酒清不醉休休暖睡穩如禪息
息勻自笑塵勞餘一念明年同泛越谿春

次韻王仲至喜雪御筵一首

三軍喜氣鑠飛花睡起空驚月在沙未集驂駟金駃
裊故殘鴉鵲玉橫斜偶還仗內身如寄尚憶江南酒
可賒宣勸不多心自醉強扶衰白拜君嘉

僕所藏仇池石希代之寶也王晉卿以小
詩借觀意在於奪僕不敢不借然以此詩

先之

海石來珠宮秀色如蛾綠坡陀尺寸間宛轉陵巒足
連娟二華頂空洞三茅腹初疑仇池化又恐瀛洲蹙

慙慙嶠南使餽餉淮東牧僕在揚州程德孺自嶺南解官以
此石見遺得之喜無寐與汝交不瀆盛以高麗盆藉以

文登玉

僕以高麗所鑄大銅盆貯之又以登州海石如碎玉者附

其足

幽光先五夜冷氣壓三伏老人生如寄衡茅久

未卜一夫幸可致千里還相逐風流貴公子竄謫武

當谷見山應已厭何事奪所欲欲留嗟趙弱寧許負

秦曲傳觀慎勿許問道歸更速

次天字韻答岑巖起

一聲清蹕霧開天百辟心莊豈貌虔回顧驚君珠玉

側同升愧我秕糠前裴回月色留壇影縹緲松香泛

蠟煙

近制以林燭松明易林盆

莫歎郎潛生白髮 聖朝

求舊鄙鳶肩

石塔寺一首并引

珍傲宋版印

世傳王播飯後鐘詩蓋揚州石塔寺事也相傳如此戲作此詩

飢眼眩東西詩腸忘蚤晏雖知燈是火不悟鐘非飯山僧異漂母但可供一莞胡為三百年記憶作此訕齋廚養若人無益祇遺患乃知飯後鐘闍梨蓋具眼

次韻蔣穎叔二首

扈從景靈宮

道人幽夢曉初還已覺笙簫下月壇風伯前驅清宿霧祝融驂乘破朝寒英姿連壁從多士妙句鏘金和八鑾已向詞臣得頗牧時穎叔集除熙河帥路人莫作老儒看

凝祥池

似知金馬客時夢碧雞坊冰雪消殘臘煙波寫故鄉鳴鑾自容與立馬久回翔乞與三韓使新圖到樂浪時高麗使在都下每至勝境輒圖畫以歸

和叔盜畫馬次韻

天驥德力備馬外龍麟中皇天不遺言兀與圖畫同駑駘飽飽官粟未受一洗空十駕均一至何事籛雲風王晉卿示詩欲奪海石錢穆父王仲至蔣

穎叔皆次韻穆至二公以爲不可許獨穎
叔不然今日穎叔見訪親觀此石之妙遂
悔前語軾以謂晉卿豈可終閉不予者若
能以韓幹二散馬易之者蓋可許也復次
前韻

相如有家山縹緲在眉綠誰云千里遠寄此一擲足
平生錦綉腸蚤歲藜莧腹從教四壁空未遣兩峯蹙
吾今况衰病義不忘樵牧逝將仇池石歸沂岷山瀆
守子不貪寶完我無瑕玉故人詩相戒妙語予所伏
一篇獨異論三占從兩卜君家畫可數天驥紛相逐
風駿掠原野電尾梢澗谷君如許相易是亦我所欲
今朝安西守來聽陽關曲勸我留此峯他日來不速
軾欲以石易畫晉卿難之穆父欲兼取二
物穎叔欲焚畫碎石乃復次前韻并解三
詩之意

春冰無真堅露葉失故綠鸚疑鵬萬里蚊笑夔一足
一豪爭攘袂先生一捧腹明鏡旣無臺淨餅何用蹙
古蹴蹙通益山不可隱畫馬無由牧聊將置庭宇何必
棄溝瀆焚寶真愛寶碎玉未忘玉久知公子賢出語
耆年伏欲觀博物妙故以求馬卜維摩旣復捨天女

還相逐授之無盡燈照此久幽谷定心無一物法樂
勝五欲三峨吾鄉井萬里君部曲臥雲行歸休破賊
見神速晉卿將種常有此志

生日蒙劉景文以古畫松鶴為壽且祝嘉

篇次韻為謝

問予一室間寧有千里廓塵心洗長松遠意發孤鶴
生朝得此壽死籍疑可落微言在參同妙契藏九籥
故人有奇趣逸想寄幽壑霜枝謝寒暑雲翻無前却
何須構明堂未羨巢阿閣緬懷別時語復作數日惡
詩映固堪殮字瘦還可愕高標忽在眼清夢了如昨
君今曾等伍志與湛輩各豈待相顧言方為不朽託
子雲老執戟長孺終主爵吾當追喬松子亦鄙衛霍
嵐薰瘴染却膚腴笑飲貪泉獨繼吳未欲連車收蕙
苾肯教沉網取珊瑚不知庾嶺三年別收得曹谿一
滴無但指庭前雙柏石要予臨老識方壺

次秦少游韻贈姚安世

帝城如海欲尋難肯捨漁舟到杏壇剝啄扣君容膝
戶巍峨笑我切雲冠問羊獨怪初平在牧豕應同德
曜看肯把參同較同異小窗相對為研丹

次丹元姚先生韻一首

浮生知幾何，僅熟一釜羹。那於俯仰間，用此委曲情。
自憐無他腸，偶亦得此生。懸知當去客，中有不亡存。
但恐宿緣重，每爲習氣昏。似聞梅子真，近在吳市門。
未能肩拊洪，但欲目擊溫。不敢扣門呼，恐作踰垣奔。
且令紹介先，徐以方便論。不學劉更生，黃金鑄尚方。
不學房次律，身事問穎陽。王烈亦何人，叔夜未可量。
獨見神山開，遽殮石髓香。至道尚聽瑩，麤材終蹶張。
先生喜而笑，幅巾登我堂。苦誓指黃壤，要言刻青琅。
蓬萊在何許，弱水空相望。且當從嵇阮，聊復數山王。
達人友四海，曲士守一疆。慎勿使形謀，兒童驚夜光。

次韻秦少游王仲至元日立春三首

省事天公厭，兩回新年春日併。相催慙慙更下山，陰
雪要與梅花作伴來。

己卯嘉辰壽阿同願渠，無過亦無功。明年春日江湖
上，回首觚稜一夢中。子由亦字同叔，元日己卯渠本命也。

詞鋒雖作楚騷寒，德意還同漢詔寬。好遣秦郎供帖
子，盡驅春色入毫端。立春日翰林學士供詩帖子。

上元侍飲樓上三首呈同列

淡月疎星遶建章，仙風吹下御爐香。侍臣鵠立通明

觀一朵紅雲捧玉皇

薄雪初消野未耕賣薪買酒看升平吾君勤儉倡優拙自是豐年有笑聲

老病行穿萬馬羣九衢人散月紛紛歸來一點殘燈在猶有傳柑遺細君侍飲樓上則貴戚爭以黃柑遺近臣謂之

傳柑蓋尚矣

送蔣穎叔帥熙河詩并引

穎叔出使臨洮賦與穆父仲至同餞之名賦詩一篇以今我來思為韻致遄歸之意軾得我字

西方猶宿師論將不及我苟無深入計緩帶我亦可承明正須君文字粲藻火自薦雖云數留行終不果

正坐喜論兵臨老付邊瑣新詩出談笑僚友困掀簸我欲歌杜楊柳方婀娜邊風事首虜所得蓋么麼

願為魯連書一射聊城筇陰功在不殺結草酬魏顆再送二首

使君九萬擊鵬鯤肯為陽關一斷魂不用寬心九千里安西都護國西門

餘刃西屠橫海鯤應予詩讖是游魂歸來趁別陶洪景看挂衣冠神虎門

次韻穎叔觀燈一首

安西老守是禪僧到處應然無盡燈永夜出遊從萬
騎諸羌入看擁千層便因行樂令投甲不用防秋更
打冰振旅歸來還侍燕十分宣勸恐難勝

次韻王晉卿奉

詔押高麗燕射

北苑傳呼陞楯郎東夷初識令君香天山自可三箭
取海國何勞一葦航宣勸不詞金盃側醉歸爭看玉
鞭長錦囊詩草勤收拾莫遣雞林得夜光

次韻錢穆父王仲至同賞田曹梅花

寒廳不知春獨立耿玉雪閉門愁永夜置酒及明發
忽驚庭戶曉未受煙雨沒浮光風宛轉照影水方折
鬢霜未易掃眉斧真自伐惟當此花前醉臥黃昏月
送襄陽從事李友諒歸錢塘

居杭積五歲自意本杭人故山歸無家欲卜西湖隣
良田不難買靜士誰當親髯張旣超然老潛亦絕倫
李子冰玉姿文行兩清淳歸從三人游便足了此身
公堤不改昨媿嶺行開新幽夢隨子去松花落衣巾
次韻吳傳正枯木歌一首

天公水墨自奇絕瘦竹枯松寫殘月夢回疎影在東
窗驚怪霜枝連夜發生成變壞一彈指乃知造物初
無物古來畫師非俗士妙想實與詩同出龍眠居士

本詩人能使龍池飛霹靂君雖不作丹青手詩眼亦
自工識拔龍眠胸中有千駟不獨畫肉兼畫骨但當
與作少陵詩或自與君拈秃筆東南山水相招呼萬
象入我摩尼珠盡將書畫散朋友獨與長鉞歸來乎
送黃師是赴兩浙憲

世久無此士我晚得王孫寧非叔度家豈出次公門
白首沈下吏綠衣有公言哀哉吳越人久爲江湖吞
官自倒帑廩飽不及黎元近聞海上港漸出水底村
願君五袴手招此半菽魂一見刺史天稍忘獄吏尊
會稽入吾手鏡湖小於盆比我東來時無復瘡痍存
送范中濟經略侍郎分韻賦詩軾得先字
且贈以魚枕盃四馬筵一

梁李久樂禍自焚豈非天兩鼠鬪穴中一勝亦偶然
謀初要百慮善後乃萬全廟堂選世將范氏真多賢
仁風被宿麥綠浪搖秦川號令聳毛羽先聲落虛弦
我家天一方去路城西偏投竿困障日賣劍行歸田
贈君荆魚盃副以蜀馬鞭一醉可以起毋令祖生先
書晁說之考牧圖後

我昔在田間但知羊與牛川平牛背穩如駕百斛舟
舟行無人岸自移我臥讀書牛不知前有百尾羊聽

我鞭聲如鼓聲我鞭不妄發視其後者而鞭之澤中
草木長草長病牛羊尋山跨坑谷騰躄筋骨強煙蓑
雨笠長林下老去而今空見畫世間馬耳射東風悔
不長作多牛翁

呂與叔學士挽詞

言中謀猷行中經關西人物數清英欲過叔度留終
日未識魯山空此生論議凋零三益支功名分付二
難兄老來尚有憂時歎此涕無從何處傾

丹元子示詩飄飄然有謫仙風氣吳傳正
繼作復次其韻

飛仙亦偶然脫命瞬息中惟詩不可擬如寫天日容
夢中哦七言玉丹已入懷一語遭虐綽失身墮蓬萊
蓬萊至今空護短不養才上界足官府謫仙應退休
可憐吳與蘇觚麟雪滿頭雪滿頭終當却與丹元子
笑指東海乘桴浮

次王定國韻書丹元子寧極齋

仙人與吾輩寓迹同一塵何曾五漿餽但有爭席人
寧極無常居此齋自隨身人那識郗鑒天不留封倫
誤落世網中俗物愁我神先生忽扣戶夜呼祁孔賓
便欲隨子去著書未絕麟願挂神虎冠往卜飲馬鄰

王郎濯紈綺意與陋巷親南游苦不蚤儻及尊鱸新

王仲至侍郎見惠穉栝種之禮曹北垣下

今百餘日矣蔚然有生意喜而作詩

翠栝東南美近生神嶽陰惜哉不可致霜根絡雲岑
仙風振高標香實隕平林偶隨樗櫟生不爲樵牧侵
忽驚黃茅嶺稍出青玉鍼好事雖力取王城少知音
豈無換鵝手但知覓來禽高懷獨夫子一見捐橐金
得之喜不寐贈我意殊深公堂開後閣凡木愧華簪
栽培一寸根寄子百年心常恐樊籠中摧我鸞鶴衿
誰知積雨後寒芒曉森森恨我迫歸老不見汝十尋
蒼皮護玉骨日莫視古今何人風雨夜臥聽飢龍吟

次韻錢穆父馬上寄蔣穎叔二首

玉鬪不用一丸泥自有長城烏鼠西剩與故人尋土
物臘糟紅麴寄駝蹄

多買黃封作洗泥使君來自隴山西高才得免人人
羨爭欲尋蹤覓舊蹄

表弟程德孺生日一首

仗下千官散紫庭時聞小語說蘇程長身自昔傳甥
舅壽骨遙知是弟兄予與君皆壽骨真耳班列中多指予二人
不問而知其爲中表也曾活萬人寧望報君在楚州予在杭州

皆過飢歲活數萬人祇求五畝却歸耕四朝遺老凋零盡
鶴髮他年幾箇迎

七年九月自廣陵召還復館于浴室東堂
八年六月乞會稽將去汶公乞詩乃復用
前韻

乞郡三章字半斜廟堂傳笑眼昏花上人問我遲留
意待賜頭綱入餅茶尚書學士得賜頭綱龍茶一斤入餅今年
綱到最遲

夢遶吳山却月廊白梅盧橘覺猶香杭州梵天寺有月廊
數百間寺中多白楊梅盧橘會稽且作須臾意從此歸田
策最良

東南此去幾時歸倦鳥孤雲豈有期斷送一生消底
物二年光景六篇詩

吳子野將出家贈以扇山枕屏一首

峩峩扇中山絕壁信天剖誰施大圓鏡衡霍入戶牖
得之老月師畫者一醉叟常疑若人胸自有雲夢藪
千巖在掌握用捨彈指久低昂不自知恨寄兒女手
短屏雖曲折高枕謝奔走出家非今日法水洗無垢
浮游雲釋嶠燕坐柳生肘忘懷紫翠間相與到白首

東府雨中別子由

庭下梧桐樹三年三見汝前年適汝陰見汝鳴秋雨
去年秋雨時我自廣陵歸今年中山去白首歸無期
客去莫歎息主人亦是客對床定悠悠夜雨空蕭瑟
起折梧桐枝贈汝千里行重來知健否莫忘此時情
謝仲適坐上送王敏仲北使

衝風振河朔飛霧失太行相逢不相識下馬須眉黃
洗眼忽驚笑見此玉節郎喜有賢主人共此燈燭光
聚散一夢中人北鴈南翔吾生如寄耳送老天一方
幸子遇明主陳經入西廂歸期不可緩倚相宜在傍
書丹元子所示李太白真

天人幾何同一漚謫仙非謫乃其游麾斥八極隘九
州化爲兩鳥鳴相酬一鳴一止三千秋開元有道爲
少留縻之不可矧肯求西望太白橫峨岷眼高四海
空無人大兒汾陽中令君小兒天台坐忘忘真生年不
知高將軍手汗吾足乃敢贖作詩一笑君應聞

次韻曾仲錫承議食蜜漬生荔支一首

代北寒壘擣非萍奇苞零落似晨星逢鹽久已成枯
臘得蜜猶應是薄刑欲就左慈求拄杖便隨李白跨
滄溟攀條與立新名字兒女稱呼恐不經俗有十八瓊
荔支

大行太皇太后挽詞二首

至矣吾

二后功高漢已還復推元祐冠蓋得永昭

全臣嘗於經筵論奏

仁宗皇帝諡曰明孝若明而不仁則民畏而

不愛仁而不明則民愛而不畏今大行太皇太后亦兼此二德故天

下思慕庶幾於仁宗也有作猶非聖無私乃是天侍臣談

要道家法信家傳宰相以下嘗於經筵論奏祖宗以來家法

十餘事書於記注

却狄安諸夏先王社稷臣固應祠百世何止活千人

定策天知我忘家帝念親萬方向以報得疾為勤民

再和曾仲錫荔支一首

柳花着水萬浮萍荔支實周天兩歲星柳至易成飛絮落水

中經宿即為浮萍荔支至難長二十四五年乃實

本自玉肌非

鷓浴至今丹殼似猩刑侍郎賦詠窮三峽妃子煙塵

動四溟莫遣詩人說功過且隨香草附騷經

次韻滕大夫三首

雪浪石

太行西來萬馬屯勢與岱嶽爭雄尊飛狐上黨天下

脊半掩落日先黃昏削成山東二百郡氣壓代北三

家村千峯右卷蠹牙帳崩崖鑿斷開土門鳩來城下

作飛石一礮驚落天驕魂承平百年烽燧冷此物僵

臥枯榆根畫師爭摹雪浪勢天工不見雷斧痕離堆
四面繞江水坐無蜀士誰與論老翁兒戲作飛雨把
酒坐看珠跳盆此身自幻孰非夢故園山水聊心存

同前

我頃三章乞越州欲尋萬壑看交流且憑造物開山
骨已見天吳出浪頭石中似有海獸形狀履道鑿池雖可
致玉川卷地若為收洛陽泉石今誰主莫學癡人李
與牛

沉香石

壁立孤峯倚硯長共疑沉水得頑蒼欲隨楚客纫蘭
佩誰信吳兒是木腸山下曾逢化松石玉中還有辟
邪香早知百和俱灰燼未信人言弱勝強

石芝詩并引

予昔夢食石芝作詩記之今乃真得石芝於海上子
由和前詩見寄予頃在京師有鑿井得如小兒手以
獻者臂指皆具膚理若生子予聞之隱者曰此肉芝也
與子由烹而食之追記其事復次前韻

土中一掌嬰兒新爪指良是肌骨勻見之怖走誰敢
食天賜我爾不及賓旌陽遠游同一許長史玉斧皆
門戶我家韋布三百年祇有陰功不知數跪陳八簋

加六瑚化人視之真塊蘇肉芝烹熟石芝老笑唾熊
掌嘖雕胡老蠶作蠶何時脫夢想至人空激烈古來
大藥不可求真契當如磁石鐵

鶴歎一首

園中有鶴馴可呼我欲呼之立坐隅鶴有難色側睨
予豈欲臆對如鵬乎我生如寄良畸孤三尺長脰閣
瘦軀俛啄少許便有餘何至以身爲子娛驅之上堂
立斯須投以餅餌視若無噫然長鳴乃下趨難進易
退我不如

送曾仲錫通判如京師

邊城歲莫多風雪強壓春醪與君別玉帳夜談霜月
苦鐵騎曉出冰河裂斷蓬飛葉卷黃沙祇有千林鬣
鬆花應爲王孫朝上國珠幢玉節與排衙左援公孝
右孟博我居其間嘯且諾僕夫爲我催歸來要與北
海春水爭先回

和錢穆父送別并求頓遞酒次韻

聯鑣接武兩長身鶴鷺行中語笑親九子羨君門戶
壯八州憐我往來頻佇聞東府開賓閣便乞西湖洗
塞塵更向青齊覓消息要知從事是何人

東坡後集卷第二

珍做宋版印

東坡後集卷第四

詩七十首

劉醜廝詩

劉生望都民病羸寄空窰有子曰醜廝十二行操瓢
播間得餘粒雪中拾墮樵飢飽共生死水火同焚漂
病翁恃一褐度此積雪宵哀哉二暴客掣去如飢鴉
翁旣死於寒客亦易此齟崎嶇走亭長不憚雪徑遙
我仇祝與苑物色同遮邀行路爲出涕二客竟就梟
饒饒訴我庭慷慨驚吾僚曰此可名寄追配柳之堯
恨我非柳子擊節爲爾謠官賜二萬錢無家可歸嬌
爲媾他日婦婉然初垂髻洗沐作小史裹頭束其腰
筆硯耕學苑戈矛戰天驕壯大隨所好忠孝福可徼
相國有折脅封侯或吹簫人事豈易料勿輕此焦僥

題毛女真

霧鬢風鬟木葉衣山川良是昔人非祗應閑過商顏
老獨自吹簫月下歸

寄鑑合刷餅與子由

老人心事日摧頽宿火通紅手自焙小甑短餅良具
足穉兒嬌女共燔煨寄君東閣閑烝栗知我空堂坐
畫灰約束家僮好收拾故山梨棗待翁來

次韻子由清汶老龍珠丹

珍傲宋版印

天公不解防癡龍玉函寶方出龍宮雷霆下索無處
避逃入先生衣袂中先生不作金椎袖玩世徜徉隱
屠酒夜光明月空自投一鍛何勞緯蕭手黃門寡好
心易足荆棘不生梨棗熟玄珠白璧兩無求無脛金
丹來入腹區區分別笑樂天那知空門不是仙

次韻子由書清汶老所傳秦湘二女圖

春風消冰失瑤玉我本無身安有觸羊生得婦如得
風握手一笑未爲辱先生室中無天遊佩環何處鳴
風甌隨魔未必皆魔女但與分燈遣歸去胡爲寫真
傳世人更要維摩一轉語丹元茅茨祇三間太極老
人時往還點檢凡心早除拂方平神鞭常使物

紫團參寄王定國一首

銛鈇土門口突兀太行頂豈惟團紫雲實自俯倒景
剛風被草木真氣入茗穎舊聞人銜芝生此羊腸嶺
織纖虎豹鬣蹙縮龍蛇癭蠹頭試小嚼龜息變方騁
矧予明真子已造浮玉境清宵月挂戶半夜珠落井
灰心寧復然汗喘久已靜東坡猶故目北藥致遺秉
欲持一椹根往有九轉鼎爲予置齒頰豈不賢酒茗

次韻劉燾撫句蜜漬荔支一首

時新滿座聞名字別久何人記色香葉似楊梅蒸霧
雨花如盧橘傲風霜每憐蓴菜下鹽豉肯與蒲萄壓
酒漿回首驚塵卷飛雪詩情真合與君嘗

立春日小集呈李端叔

白髮已十載青春無一堪不驚新歲換聊與故人談
牛健民聲喜鴉嬌雪意酣霏微不到地和暖要宜蠶
歲月斜川似風流曲水慚行吟老燕代坐睡夢江潭
丞掾頗哀援歌呼誰怕參衰懷久灰槁習氣尚饒貪
白啖本河朔紅消真劍南辛盤得青葙臘酒是黃柑
歸臥燈殘帳醒聞葉打庵須煩李居士重說後三三
次韻曾仲錫元日見寄

蕭索東風兩鬢華年年幡勝翦宮花愁聞塞曲吹蘆
管喜見春榮得蓼芽吾國舊供雲澤米定武齋酒用蘇
州米君家新致雪坑茶近得曾坑茶燕南異事真堪記

三寸黃柑擘永嘉

子由生日以檀香觀音像及新合印香銀
篆槃爲壽一首

梅檀婆律海外芬西山老臍柏所薰香螺脫鷹來相
羣能結縹眇風中雲一燈如螢起微焚何時度盡繆
篆紋繚繞無窮合復分緜綿浮空散氤氳東坡持是

壽卯君君少與我師皇墳旁資老聃釋迦文共厄中
年點蠅蚊晚遇斯須何足云君方論道承華勛我亦
旗鼓巖中軍國恩當報敢不勤但願不爲世所醺爾
來白髮不可耘問君何時返鄉枌收拾散亡理放紛
此心實與香俱君聞思大士應已聞

次韻李端叔送保倅翟安常赴闕兼寄子
由

中山保塞兩窮邊臥治雍容已百年顧我迂愚分竹
使與君談笑用蒲鞭松荒三徑思元亮草合平池憶
惠連白髮歸心憑說與古來誰似兩疎賢

中山松醪寄雄守王引進

鬱鬱蒼髯千歲姿肯來盃酒作兒嬉流芳不待龜巢
葉唐人以荷葉爲酒盃謂知若甯酒掃白聊煩鶴踏枝醉裏
便成歌雪舞醒時與作嘯風辭馬軍走送非無意玉
帳人閑合有詩

次韻李端叔謝送牛戩鴛鴦竹石圖一首

聞君談西戎廢食忘蚤晚王師本不陣賊壘何足刻
守邊在得士此語要而簡知君論將口似我識畫眼
笑指塵壁間此是老牛戩平生師衛玠非意常理遣
訴君定何人未用市朝顯置之勿復道世俗固多舛

歸去亦何須單車渡穀澗如蟲得羽化已脫安用蠶
家書空萬軸涼曝困舒卷念當掃長物閉息默自煖
此畫聊付君幽處得小展新詩勿縱筆羣吠驚邑犬
時來未可知妙斲待輪扁

次韻聰上人見寄

前身本同社宿業獨臨邊一悟鏡空老始知圓澤賢
歸心忘犢佩生術寄羊鞭不似歐陽子空留六一泉

次韻王雄州還朝留別

老李威名八十年壁間精悍見遺顏自聞出守風流
似稍覺承平氣象還但遣詩人歌杖杜不妨侍女唱
陽關內朝接武知何日白髮羞歸供奉班

三月二十日多葉杏盛開

零露泣月藥溫風散晴葩春工了不睡連夜開此花
芳心誰翦刻天質自清華惱客香有無弄粧影橫斜
中山古戰國殺氣浮高牙叢臺餘袂服易水雄悲笳
自從此花開玉肌洗塵沙坐令游俠窟化作溫柔家
我老念江海不飲空咨嗟明年花開時舉酒望三巴
蓋欲請梓州而歸也

三月二十日開園三首

雪髯霜鬢語蒼獍澹蕩園林取次行要識將軍不凡

意從來祇啜小人羹是日散父老酒食

西園牡籥夜沉沉尚有游人臥柳陰鶴睡覺時風露
下落花飛絮滿衣襟

鬱鬱蒼髯真道友絲絲紅萼是鄉人蒼髯松也紅萼海棠
何時翠竹江村路送我柴門月色新

次韻王雄州送侍其涇州

威聲又數中興年二虜行當一矢聯聞道名城得真
將故應驚羽落空弦追鋒歸去雄三衛授鉞重來定
十連別酒回頭便陳迹號呶端合發初筵

臨城道中作并引

予初赴中山連日風埃未嘗了了見太行也今將適
嶺表頗以是爲恨過臨城內丘天氣忽清徹西望太
行草木可數岡巒北走崖谷秀傑忽悟歎曰吾南遷
其速返乎退之衡山之祥也書以付邁使志之
逐客何人著眼看太行千里送征鞍未應愚谷能留
柳可獨衡山解識韓

過湯陰市得豌豆大麥粥示三兒子一首

朔野方赤地河濡但黃塵秋霖暗豆漆夏旱臞麥人
逆旅唱晨粥行庖得時珍青班照七筴脆響鳴牙齧
玉食謝故吏風殄便逐臣漂零竟何適浩蕩寄此身

爭勸加飲食實無負吏民何當萬里客歸及二年新
子由新脩汝州龍興寺吳畫壁

丹青久衰工不藝人物尤難到今世每摹市井作公
卿畫手懸知是徒隸吳生已與不傳死那復典刑留
近歲人間幾處變西方盡作波濤翻海勢細觀手面
分轉側妙算毫釐得天契始知真放本精微不比狂
花生客慧似聞遺墨留汝海古壁蝸涎可垂涕力捐
金帛扶棟宇錯落浮雲卷新霽使君坐歎清夢餘幾
疊衣紋數衿袂他年弔古知有人姓名聊記東坡弟
過高郵寄孫君孚一首

過淮風氣清一洗塵埃容水木漸幽茂菰蒲雜游龍
可憐夜合花青枝散紅茸美人游不歸一笑當誰供
故園在何處已偃手種松我行忽失路歸夢山千重
聞君有負郭二頃收橫從卷野畢秋穫殷牀聞夜春
樂哉何所憂社酒粥面釀宦游豈不好毋令到千鍾
僕所至未嘗出遊過長蘆聞天禪師病甚
不可不一問既見則有問矣明日阻風復
留見之作三絕句呈聞復并請轉呈參寥
子各賦數首

亦知壺子不死敢問老聃所游瑟瑟寒松露骨眈眈

病虎垂頭

莫言西蜀萬里且到南華一游扶病江邊送客杖屨

浦口回頭

老去此生一訣興來明日重游臥聞三老白事半夜

南風打頭

六月七日泊金陵阻風得鍾山泉公書寄

詩爲謝

今日江頭天色惡礮車雲起風欲作獨望鍾山喚寶
公林間白塔如孤鶴寶公骨冷喚不聞却有老泉來
喚人電眸虎齒霹靂舌爲子吹散千峯雲南行萬里
亦何事一酌曹谿知水味他年若畫蔣山圖爲作泉
公喚居士

贈清涼寺和長老

代北初辭沒馬塵江南來見臥雲人問禪不契前三
語施佛空留丈六身老去山林徒夢想雨餘鐘鼓更
清新會須一洗黃茅瘴未用深藏白氎巾

予前後守俸餘杭凡五年夏秋之間烝熱
不可過獨中和堂東南頰下瞰海門洞視
萬里三伏常蕭然也紹聖元年六月舟行
赴嶺外熱甚忽憶此處而作是詩

忠孝王家千柱宮東坡作吏五年中中和堂上東南
頰獨有人間萬里風

慈湖夾阻風五首

捍索桅竿立嘯空篙師酣寢浪花中故應營蒯知心
腹弱纜能爭萬里風

此生歸路愈茫然無數青山水拍天猶有小船來賣
餅喜聞墟落在山前

我行都是退之詩真有人家水半扉千頃桑麻在船
底空餘石髮挂魚衣

月輪亭千汗珠融誰識南詔長養功暴雨過雲聊一
快未妨明月却當空

臥看落月橫千丈起喚清風得半帆且並水村欹側
過人間何處不巉巖

過廬山下一首并引

予過廬山下雲物騰涌默有禱焉未午衆峯凜然故
作是詩

亂雲欲覆山勢與飄風南羣嶺相應和勇往爭驂驪
可憐蒼蔚中時出紫翠嵐鴈沒失東嶺龍騰見西龕
一時供坐笑百態變立談暴雨破塊圯清飈掃渾酣
廓然歸何處陋矣安足戡亭亭紫霄峯窈窕白石庵

五老數松雪雙谿落落天潭雖云默禱應顧有移文慚

壺中九華詩并引

湖口人李正臣蓄異石九峯玲瓏宛轉若窗櫺然予欲以百金買之與仇池石為偶方南遷未暇也名之曰壺中九華且以詩記之

清谿電轉失雲峯夢裏猶驚翠掃空五嶺莫愁千嶂外九華今在一壺中天池水落層層見玉女凶明處處通念我仇池太孤絕百金歸買碧玲瓏

江西一首

江西山水真吾邦白沙翠竹石底江舟行十里磨九龍篙聲擘响相春撞醉臥欲醒聞淙淙真欲一口吸老龐何人得儁窺魚缸舉叉絕叫尺鯉雙

秧馬歌一首并引

過廬陵見宣德郎致仕曾君安止出所作禾譜文既溫雅事亦詳實惜其有所缺不譜農器也予昔游武昌見農夫皆騎秧馬以榆棗為腹欲其滑以楸桐為背欲其輕腹如小舟昂其首尾背如覆瓦以便兩髀雀躍于泥中繫束藁其首以縛秧日行千畦較之偃僂而作者勞佚相絕矣史記禹乘四載泥行乘橇解者曰橇形如箕擲行泥上豈秧馬之類乎作秧馬歌

一首附于禾譜之末云

春雲濛濛雨淒淒春秧欲老翠剡齊嗟我婦子行水
泥朝分一壠莫千畦腰如篋篋首豕雞筋煩骨殆聲
酸嘶我有桐馬手自提頭尻軒昂腹脅低背如覆瓦
去角圭以我兩足爲四蹄聳踊滑汰入聲如鳧鷖織
纖束藁亦可齎何用繁纓與月題鳩從畦東走畦西
山城欲閉聞鼓聲忽作的盧躍檀溪歸來挂壁從高
栖了無芻秣飢不啼少壯騎汝逮老鰲何曾蹶軼防
顛擠錦韉公子朝金閨笑我一生蹋牛犁不知自有
木馱騃

八月七月初入贛過惶恐灘

七千里外二毛人十八灘頭一葉身山憶喜歡勞遠
夢蜀道有錯喜歡鋪在大散關上地名惶恐泣孤臣長風送
客添帆腹積雨扶舟減石鱗便合與官充水手此生
何止略知津

鬱孤臺以下四首皆虔州

入境見圖畫鬱孤如舊游山爲翠浪涌水作玉虹流
日麗崆峒曉風酣章貢秋丹青未變葉鱗甲欲生洲
嵐氣昏城樹灘聲入市樓煙雲侵嶺路草木半炎州
故國千峯外高臺十日留他年二宿處準擬繫歸舟

廉泉

水性故自清不清或撓之君看此廉泉五色爛摩尼
廉者爲我廉我以此名爲有廉則有貪有慧則有癡
誰爲柳宗元孰是吳隱之漁父足豈潔許由耳何濫
紛紛立名字此水了不知毀譽有時盡不知無盡時
揭來廉泉上捋須看鬢眉好在水中人到處相娛嬉

塵外亭

楚山澹無塵贛水清可厲散策塵外游麾手謝此世
山高惜人力十步輒一憩却立浮雲端俯視萬井麗
幽人宴坐處龍虎爲斬薙馬駒獨何疑豈墮山鬼計
夜垣非助我謬敬欲其逝戲留一轉語千載起攘袂

天竺寺并引

予年十二先君自虔州歸爲予言近城山中天竺寺
有樂天親書詩云一山門作兩山門兩寺元從一寺
分東澗水流西澗水南山雲起北山雲前臺花發後
臺見上界鐘清下界聞遙想吾師行道處天香桂子
落紛紛筆勢奇逸墨迹如新今四十七年矣予來訪
之則詩已亡有刻石存耳感涕不已而作是詩

香山居士留遺迹天竺禪師有故家空詠連珠吟疊
壁已亡飛鳥失驚蛇林深野桂寒無子雨滄山薑病

有花四十七年真一夢天涯流落涕橫斜

過大庾嶺一首

一念失垢汙身心洞清淨浩然天地間惟我獨也正
今日嶺上行身世永相忘仙人拊我頂結髮授長生
宿建封寺曉登盡善亭望韶石二首

雙闕浮空照短亭至今猿鳥獻青熒君王自此西巡
狩再使魚龍舞洞庭

蜀人文賦楚人辭堯在崇山舜九疑聖主若非真得
道南來萬里亦何爲

嶺海東南月窟西功成天已錫玄珪此方定是神仙
宅禹亦東來隱會稽

月華寺一首 寺隣岑水場施者皆坑戶也百年間

蓋二焚矣

天公胡爲不自憐結土融石爲銅山萬人採斲富媪
泣祇有金帛資豪姦脫身獻佛意可料一瓦坐待千
金還月華二火豈天意至今芟舍依榛菅僧言此地
本龍象興廢反掌曾何艱高巖夜吐金碧氣曉得異
石青爛斑坑流窟發錢涌地莫施百鎰朝千鏹此山
出寶以自賊地脈已斷天應慳我願銅山化南畝爛
漫黍麥蘇惇鰥道人脩道要底物破鐙煑飯茹三間

南華寺一首

珍做宋版印

云何見祖師要識本來面亭亭塔中人問我何所見
可憐明上座萬法了一電飲水既自知指月無復眩
我本脩行人三世積精練中間一念失受此百年譴
摠衣禮真相感動淚雨霰借師錫端泉洗我綺語硯
碧落洞一首在英州下十五里

槎牙亂峯合晃蕩絕壁橫遙知紫翠間古來仙釋并
陽崖射朝日高處連玉京陰谷扣白月夢中游化城
果然石門開中有銀河傾幽龕入窈窕別戶穿虛明
泉旒下珠琲乳蓋交縵纓我行畏人知恐爲仙者迎
小語輒響答空山自雷驚策杖歸去來治具煩方平
峽山寺一首傳奇所記孫恪袁氏事卽此寺至今

有人見白猿者

天開清遠峽地轉凝碧灣我行無遲速攝衣步履顏
山僧本幽獨乞食況未還雲碓水自舂松門風爲關
石泉解娛客琴筑鳴空山佳人劍翁孫游戲暫人間
忽憶嘯雲侶賦詩留玉環林空不可見霧雨霾髻鬢
舟行至清遠縣見顧秀才極談惠州風物
之美一首

到處聚觀香案吏此邦宜着玉堂仙江雲漠漠桂花

溼海兩脩脩荔子然聞道黃柑常抵鷓不容朱橘更
論錢恰從神虎來弘景便向羅浮見稚川

廣州蒲瀾寺一首地產菖蒲十二節相傳安期生

之故居始皇訪之於此

不用山僧導我前自尋雲外出山泉千章古木臨無
地百尺飛濤瀉漏天舊日菖蒲方士宅後來詹蔔祖
師禪而今祇有花含笑笑道秦皇欲學仙山中多含笑
花

贈蒲瀾信長老一首

優鉢曇花豈有花問師此曲唱誰家已從子美得桃
竹此山有桃竹可作杖而土人不識予始錄子美詩遺之不向安
期覓棗瓜燕坐林間時有虎高眠粥後不聞鴉勝游
自古兼支許爲探松肪寄一車

發廣州一首

朝市日已遠此身良自如二杯軟飽後浙人謂飲酒爲
軟飽一枕黑甜餘俗謂睡爲黑甜蒲瀾疎鐘外黃灣落
木初天涯未覺遠處處各樵漁

浴日亭一首在南海廟前

劍氣崢嶸夜插天瑞光明滅到黃灣坐看暘谷浮金
暈遙想錢塘涌雪山已覺滄涼蘇病骨更煩沆瀣洗

衰顏忽驚鳥動行人起飛上千峯紫翠間

游羅浮山一首示兒子過

人間有此白玉京羅浮見日雞一鳴南樓未必齊日

觀鬱儀自欲朝朱明劉夢得有詩記羅浮夜半見日事山不甚

高而夜見日此可異也山有二石樓今延祥寺在南樓下朱明洞在

冲虛觀後云是蓬萊第七洞天東坡之師抱朴老真契蚤已

交前生玉堂金馬久流落寸田尺宅今歸耕道華亦

嘗啖一棗唐永樂道士侯道華竊食鄧天師藥仙去永樂有無核

棗人不可得道華獨得之予在岐下亦嘗得食一枚契虛正欲仇

二彭唐僧契虛遇人導游稚川仙府真人問曰汝絕二彭之仇乎契

虛不能答鐵橋石柱連空橫山有鐵橋石柱人罕至者杖藜

欲趁飛猿輕雲谿夜逢瘖虎伏山有啞虎巡山斗壇書

出銅龍獐冲虛觀後有朱真人朝斗壇近於壇上獲銅龍六銅魚

一小兒少年有奇志中宵起坐存黃庭近者戲作凌

雲賦筆勢髣髴離騷經負書從我去盍歸去羣仙正草

新宮銘汝應奴隸蔡少霞我亦季子山山玄卿唐有夢書

新宮銘者云紫陽真人山玄卿撰其略曰良常西麓原澤東泄新宮

宏宏崇軒轅轍又有蔡少霞者夢人遺書碑略曰公昔乘魚車今履

瑞雲躡空仰塗綺輅輪困其末題云五雲書閣吏蔡少霞書還須

略報老同叔羸糧萬里尋初平子由一字同叔

十月二日初到惠州一首

髣髴曾游豈夢中欣然雞犬識新豐
吏民驚怪坐何事父老相攜迎
此翁蘇武豈知還漠北管寧自欲老
遼東嶺南萬戶皆春色嶺南萬戶酒
會有幽人客寓公

寓居合江樓一首

海山葱朧氣佳哉二江合處朱樓開
蓬萊方丈應不遠肯爲蘇子浮江來
江風初涼睡正美樓上啼鴉呼我起
我今身世兩相違西流白日東流水
樓中老人日清新天上豈有癡仙人
三山咫尺不歸去一盃付與羅浮春
予家釀酒名羅浮春

白水山佛迹巖一首羅浮之東麓也在惠州東

北二十里

何人守蓬萊夜半失左股浮山若鵬蹲
忽展垂天羽根株互連絡崖嶠爭吞吐
神工自爐鞴融夜相綴補至今餘隙罅
流出千斛乳方其吹合時天匠麾月斧
帝觴分餘瀝山骨醉后土峯巒尚開闔
澗谷猶呼舞海風吹未凝古佛來布武
當時汪岡氏投足不蓋拊青蓮雖不見
千古落花雨雙谿匯九折萬馬騰一鼓
奔雷濺玉雪潭洞開水府潛鱗有飢蛟
掉尾取渴虎我來方醉後濯足聊戲侮
回風卷飛電掠面過強弩

山靈莫惡劇微命安足賭此山吾欲老慎勿厭求取
谿流變春酒與我相賓主當連青竹竿下灌黃精圃

詠湯泉一首在白山水山

積火焚大槐蓄油災武庫驚然丞相井疑浣將軍布
自憐耳目隘未測陰陽故鬱攸火山裂虜沸湯泉注
豈惟渴獸駭坐使癡兒怖安能長魚鼈僅可尋狐兔
山中惟木客戶外時芒屨雖無傾城浴幸免亡國汗

自笑一首

予石如琢玉遠煙真削鬣入我病風手古語云磨墨如

病風手

玄雲淪淪淒淒是中有何好而我喜欲迷既似

蠟屐阮又如鍛柳愁醉筆得天全宛宛天投霓多謝
中書君伴我此幽栖

朝雲詩并引

世謂樂天有粥駱馬放楊柳枝詞嘉其主老病不忍
去也然夢得有詩云春盡絮飛留不得隨風好去落
誰家樂天亦云病與樂天相伴住春隨樊子一時歸
則是樊素竟去也予家有數妾四五年相繼辭去獨
朝雲者隨予南遷因讀樂天集戲作此詩朝雲姓王
氏錢塘人嘗有子曰幹兒未期而夭云
不似楊枝別樂天恰如通德伴伶玄阿奴絡秀不同

老天女維摩總解禪經卷藥爐新活計舞衫歌扇舊
因緣丹成逐我三山去不作巫陽雲雨仙

寄虎兒一首

獨倚枕榔樹閑挑篲撥根謀生看拙否送老此蠻村
十一月二十六日松風亭下梅花盛開一

首

春風嶺上淮南村昔年梅花曾斷魂予昔赴黃州聲風嶺
上見梅花有兩絕句明年正月往岐亭道中賦詩云去年今日關山
路細雨梅花正斷魂豈知流落復相見蠻風蜩雨愁黃昏
長條半落荔支浦臥樹獨秀枕榔園豈惟幽光留夜
色直恐冷豔排冬溫松風亭下荆棘裏兩株玉蕊明
朝噉海南仙雲嬌墮砌月下縞衣來扣門酒醒夢覺
起繞樹妙意有在終無言先生獨飲勿歎息幸有落
月窺清樽

再用前韻一首

羅浮山下梅花村玉雪爲骨冰爲魂紛紛初疑月挂
樹耿耿獨與參橫昏先生索居江海上悄如病鶴栖
荒園天香國豔肯相顧知我酒熟詩清溫蓬萊宮中
花鳥使綠衣倒挂扶桑噉抱叢窺我方醉臥故遣啄
木先敲門麻姑過君急洒掃烏能歌舞花能言酒醒

人散山寂寂惟有落葉黏空樽
嶺南珍禽有倒挂子綠毛紅喙如鸚鵡而小自海東來非塵埃間物也

新釀桂酒一首

擣香篩辣入餅盆盎盎春谿帶雨渾收拾小山藏社
甕招呼明月到芳樽酒材已遣門生致菜把仍叨地主
恩爛煮葵羹斟桂醕風流可惜在蠻村

惠守詹君見和復次韻一首

已破誰能惜甌盆頽然醉裏得全渾欲求公瑾一困
米試滿莊生五石樽三盃卯困忘家事萬戶春濃感
國恩刺史不須邀半道籃輿未暇走山村

花落復次前韻一首

玉妃謫墮煙雨村先生作詩與招魂人間草木非我
對奔月偶桂成幽昏闇香入戶尋短夢青子綴枝留
小園披衣連夜喚客飲雪膚滿地聊相溫松明照坐
愁不睡井花入腹清而曠先生年來六十化道眼已
入不二門多情好事真習氣惜花未忍終無言留連
一物吾過矣笑領百罰空壘樽

東坡後集卷第五

詩六十七首

江郊一首并引

惠州歸善縣治之北數百步抵江少西有盤石小潭可以垂釣作江郊詩云

江郊葱曩雲水蒨絢碕岸斗入洄潭輪轉先生悅之布席間燕初日下照潛鱗俯見意釣忘魚樂此竿綫優哉悠哉玩物之變

詹守攜酒見過用前韻作詩聊復和之一首

箕踞狂歌老瓦盆燎毛燔肉似羌渾傳呼草市來攜客洒掃漁磯共置樽山下黃童爭看舞江干白骨已銜恩時詹方議葬暴骨孤雲落日西南望長羨歸鴉自識村

寄鄧道士一首并引

羅浮山有野人相傳葛稚川之隸也鄧道士守安山中
有道者也嘗於庵前見其足迹長二尺許紹聖二年正月十日予偶讀韋蘇州寄全椒山中道士詩云今朝郡齋冷忽念山中客澗底東荆薪歸來煮白石遙持一樽酒遠慰風雨夕落葉滿空山何處尋行迹

乃以酒一壺仍依蘇州韻作詩寄之云

一盃羅浮春遠餉探薇客遙知獨酌罷醉臥松下石
幽人不可見清嘯聞月夕聊戲庵中人空飛本無迹

上元夜一首

前年侍玉輦端門萬枝燈璧月挂罽毼珠星綴觚稜
去年中山府老病亦宵興牙旗穿夜市鐵馬響春冰
今年江海上雲房寄山僧亦復舉膏火松間見層層
散策桃榔林林疎月鬢髻使君置酒罷簫鼓轉松陵
狂生來索酒賈道人也一舉輒數升浩歌出門去我亦
歸曹騰

正月二十四日與兒子過賴仙芝玉原秀才僧曇穎行全道士何宗一同游羅浮道院及栖禪精舍過作詩和其韻寄邁迨一首

斷橋隔勝踐脫屣欣小揭瘴花已繁紅官柳猶疎細
斜川二三子悼歎吾年逝淒涼羅浮館風壁頽雨砌
黃冠常苦飢迎客羞破袂仙山在何許歸鶴時墮毳
崎嶇拾松黃欲救齒髮弊坐令禪客笑一夢等千歲
栖禪晚置酒蠻果粲蕉荔齋廚釜無羹野餉籃有蕙
嬉游趁時節俯仰了此世猶當洗業障更作臨水禊

寄書陽羨兒并語長頭弟門戶各努力先期畢租稅
正月二十六日偶與數客野步嘉祐僧舍
東南野人家雜花盛開扣門求觀主人林
氏媪出應白髮青裙少寡獨居三十年矣
感歎之餘作詩記之一首

縹蒂細枝出絳房綠陰青子送春忙涓涓泣露紫含
笑熠熠燒空紅拂桑落日孤煙知客恨短籬破屋爲
誰香主人白髮青裙袂子美詩中黃四娘

龍尾石硯寄猶子遠

皎皎穿雲月青青出水荷文章工點黝忠義老研磨
偉節何須怒寬饒要少和吾衰此無用寄與小東坡
遠爲人類子

贈王子直秀才一首

萬里雲山一破裘杖端閑挂百錢游五車書已留兒
讀二頃田應爲鶴謀水底笙歌蛙兩部山中奴婢橘
千頭幅巾我欲相隨去海上何人識故侯

次韻表兄程正輔江行見桃花一首

曲士賦懷沙草木傷莽莽德人無荆棘坐失嶺嶠阻
我兄瑚璉姿流落瘴江浦淨眼見桃花紛紛墮紅雨
蕭然振衣袂笑問散花女我觀解語花粉色如黃土

一言破千偈況爾初不語可憐一轉話他日如何舉
故復此微吟聊和鷗鴉檣江邊閑草木閑客當爲主
爾來子美瘦正坐作詩苦袖手焚筆硯清篇真漫與
願兄理北轅六轡去如組上林桃花開水暖鴻北翥
追錢正輔表兄至博羅賦詩爲別一首

孤臣南游墮黃菅君亦何事來牧蠻艤舟蜚戶龍岡
窟置酒椰葉枕榔間高談已笑衰語陋傑句尤覺清
詩屢博羅小縣僧舍古我不忍去君忘還君應回望
秦與楚夢涉漢水愁秦關我亦坐念高安客神游黃
蘗參洞山何時曠蕩洗瑕謫與君歸駕相追攀梨花
寒食隔江路兩山遙對雙烟鬢歸耕不用一錢物惟
要兩腳飛屣顏玉牀丹鏃記分我助我金鼎光爛斑
再用前韻賦一首

樂天霜鬢如霜菅始知謝遣素與蠻我兄綠髮蔚如
故已了夢幻齊人間蛾眉勸酒聊爾耳處仲太忍茂
弘孱三盃徑醉便歸臥海上知復幾往還連娟六么
趁蹋鞠杳眇三疊滎陽關酒醒夢斷何所有落花流
水空青山忽驚鏡鼓發半夜明月不許幽人攀贈行
無物惟一語莫遣瘴霧侵雲鬢羅浮道人一傾蓋欲
繫白日留君顏應知我是香案吏他年許綴蓬萊班

真一酒一首并引

米麥水三一而已此東坡先生真一酒也

撥雪披雲得乳泓蜜蠶又欲醉先生真一色味頗類予在
黃州日所醞蜜酒也稻垂麥仰陰陽足器絜泉新表裏清
曉日着顏紅有暈春風入髓散無聲人間真一東坡
老與作青州從事名

游博羅香積寺一首并引

寺去縣七里三山犬牙夾道皆美田麥禾甚茂寺下
谿水可作碓磨若築塘百步聞而落之可轉兩輪舉
四杵也以屬縣令林林使督成之

二年流落鼃魚鄉朝來喜見麥吐芒東風搖波舞淨
綠初日泫露酣嬌黃汪汪春泥已沒膝剡剡秋穀初
分秧誰言萬里出無友見此二美喜欲狂三山屏擁
僧舍小一谿雷轉松陰涼要令水力供白磨與相地
脈增隄防霏霏落雪看收麪隱隱疊鼓聞春糠散流
一啜雲子白炊裂十字瓊肌香豈惟牢九薦古味東
哲餅賦云漫頭薄持起搜牢九要使真一流仙漿詩成捧腹
便絕倒書生說食真膏肓

次韻定慧欽長老見寄八首

蘇州定慧長老守欽使其徒卓契順來惠州問予安

否且寄擬寒山十頌語有粲忍之通而詩無島可之
寒吾甚嘉之爲和八首

左角看破楚南柯聞長滕鈎簾歸乳燕穴紙出癡蠅
爲鼠常留飯憐蛾不點燈崎嶇真可笑我是小乘僧
鐵橋本無柱石樓豈有門舞空五色羽吹雲千歲根
松花釀仙酒木客餽山殮我醉君且去陶云吾亦云
羅浮高萬仞下看扶桑卑默坐朱明洞玉池自生肥
從來性坦率醉語漏天機相逢莫相問我不記吾誰
幽人白玉觀大士甘露滅根塵各清淨心境兩奇絕
真源未純熟習氣餘陋劣譬如已放鷹中夜時掣紐
誰言窮巷士乃竊造物權所見皆我有安居受其全
戲作一篇書千古發爭端儒墨起相殺予初本無言
閒居蓄百毒救彼跛與盲依山作陶穴掩此暴骨橫
區區效一漑豈能濟含生力惡不已出時哉非汝爭
少壯欲及物老閑餘此心微生山海間坐受瘴霧侵
可憐鄧道士攝衣問呻吟覆舟却私渡斷橋費千金
淨名毘耶中妙喜恆沙外初無往來相二士同一在
云何定慧師尚欠行腳債請判維摩憑一到東坡界

三月十九日攜白酒鱸魚過詹史君食槐

葉冷淘一首

枇杷已熟粲金珠桑落初嘗蠶玉蛆暫借垂蓮十分
瓊一澆空腹五車書青浮卵盃槐芽餅紅點水漿藿
葉魚醉飽高眠真事業此生有味在三餘

江漲用過韻一首

草木生故墟牛羊滿空瀆春江圍草市夜浪浮竹屋
已連漲海白尚帶霍山綠坎離更休王魚鼈橫陸
得非崑崙囚欲報陸渾蚺行看北風競來救南國蹙
長驅連山燒一掃含沙毒孤吟愍造化何時停倚伏
當憐水旱氓不作舟車蓄江流儻席卷社酒期茆縮

連雨江漲二首

越井岡頭雲出山特柯江上水如天牀牀避漏幽人
屋浦浦移家蛭子船龍卷魚鰕并雨落人隨雞犬上
牆眠祇應樓下平堦水長記先生過嶺年

急雨蕭蕭作晚涼臥聞榕葉響長廊微明燈火耿殘
夢半溼簾帷浥舊香高浪隱牀吹甕盎聞風驚樹擺
琳琅先生不出晴無用留向空堦滴夜長

四月初一日初食荔支一首

南村諸楊北村盧謂楊梅盧橘也白花青葉冬不枯垂

黃綴紫煙雨裏特與荔支爲先驅海山仙人絳羅襦
紅紗中單白玉膚不須更待妃子笑風骨自是傾城

姝不知天工有意無遣此尤物生海隅雲山得伴松
檜老霜雪自因楂梨龕先生洗瓊酌桂醕水槃薦此
頰虬珠似開江鱔斫玉柱更洗河豚烹腹腴予嘗謂荔
支厚味高格兩絕果中無比惟江鱔柱河豚魚近之耳
我生涉世
本爲口一官久已輕尊鱸人間何者非夢幻南來萬
里真良圖

枕榔杖寄張文潛一首時初聞黃魯直遷
黔南范淳父九疑也

睡起風清酒在亡身隨殘夢兩茫茫江邊曳杖枕榔
瘦林下尋苗蕪撥香獨步儻逢峒嶮令遠來莫恨曲
江張遙知魯國真男子猶憶平生盛孝章

答周循州一首

蔬飯藜牀破衲衣掃除習氣不吟詩前生似是盧行
者後學過呼韓退之未敢扣門求夜話時叨送米續
晨炊知君清俸難多輟且覓黃精與療飢

次韻程正輔游碧落洞一首

空山不難到絕境未易名何時謫仙人來作鈞天聲
胸中幾雲夢餘地方恢宏長庚與北斗錯落綴冠纓
黃公獻紫芝赤松醜青精谿山久寂寞請續離騷經
抱枝寒蛭咽繞耳飛蚊清謫仙拊掌笑笑此羽皇銘

我頃嘗獨游自適孤雲情君今又繼往霧雨愁青冥
感君兄弟意尋羊問初平玉牀分箭鏃不忍獨長生
詩成輒寄我妙絕陶謝并孤鴻方避弋老驥猶在坵
鳥獸如可羣永寄槁木形何山不堪隱飲水自脩齡
羽蟲見月爭翻翻我亦散髮虛明軒千梳冷快肌骨
醒風露氣入霜蓬根起舞三人漫相屬停盃一問終
無言曲肱薤簞有佳處夢覺瓊樓空斷魂

荔支歎一首

十里一置飛塵灰五里一候兵火催顛坑仆谷相枕
藉知是荔支龍眼來飛車跨山鶻橫海風枝露葉如
新採宮中美人一破顏驚塵濺血流千載永元荔支
來交州天寶歲貢取之涪至今欲食林甫肉無人舉
觴酌伯游漢永元中交州進荔支龍眼十里一置五里一候奔馳
死亡罹猛獸毒蟲之害者無數唐羌字伯游爲臨武長上書言狀和
帝罷之唐天寶中蓋取涪州荔支自子午谷路進入我願天公憐
赤子莫生尤物爲瘡痍君不見武夷谿邊粟粒芽前
丁後蔡相籠加爭新買寵各出意今年鬪品充官茶
吾君所乏豈此物致養口體何陋耶洛陽相君忠孝
家可憐亦進姚黃花落下貢花自錢惟演始大小龍茶始於丁

晉公而成於君謨歐陽永叔聞君謨進小龍團驚歎曰君謨士人也
何至作此事今年閩中監司乞進鬪茶許之

江月五首并引

嶺南氣候不常吾嘗云菊花開時乃重陽涼天佳月
卽中秋不須以日月爲斷也今歲九月殘暑方退旣
望之後月出愈遲然予常夜起登合江樓或與客游
豐湖入栖禪寺扣羅浮道院登逍遙堂逮曉乃歸杜
子美云四更山吐月殘夜水明樓此殆古今絕唱也
因其句作五首仍以殘夜水明樓爲韻

一更山吐月玉塔臥微瀾正似西湖上涌金門外看
水輪橫海闊香霧入樓寒停鞭且莫上照我一盃殘
二更山吐月幽人方獨夜可憐人與月夜夜江樓下
風枝久未停露草不可藉歸來掩關臥唧唧蟲夜話
三更山吐月栖鳥亦驚起起尋夢中游清絕正如此
驅雲掃衆宿俯仰迷空水幸可飲我牛不須違洗耳
四更山吐月皎皎爲誰明幽人赴我約坐待玉繩橫
野橋多斷板山寺有微行今夕定何夕夢中游化城
五更山吐月窗迥室幽幽玉鈎還挂戶江練却明樓
星河澹欲曉鼓角冷知秋不眠翻五詠清切變蠻謳

聞正輔表兄將至以詩迎之

生逢堯舜仁得作嶺海游雖懷寔然喜豈免跼墮憂
莫雨侵重髓曉烟騰鬱攸朝槃見蜜啣夜枕聞鶉鷄
幾欲烹鬱屈固嘗饜鉤舌音漸獠變面汗嘗駢羞
賴我存黃庭有時仍丹丘目聽不任耳踵息殆廢喉
稍欣素月夜遂度黃茆秋我兄清廟器持節瘴海頭
蕭然三家步橫此萬斛舟人言得漢吏天遣活楚囚
惠然再過我樂哉十日留但恨三語賢忽潛九原幽
萬里儻同歸兩鰥當對耄軾喪婦已三年矣正輔近亦有亡
嫂之戚故云強歌非真達何必師莊周

再和

稚川真長生少從鄭公游孝章偶不死免爲文舉憂
餘齡會有適獨往豈相攸由來警露鶴不羨撮蚤鷄
願加視後鞭同駕躅空轉寧殄墮齒董勿憶齊眉羞
何時遂縱壑歸路回首丘著意尋彌明長頸高結喉
東岡松柏老西嶺橘柚秋無心逐定遠燕頤飛虎頭
君方卒功名一泛范蠡舟我亦沾沛渥漸解鍾儀囚
寧須張子房萬戶自擇留猶勝嵇叔夜孤憤甘長幽
南窗可寄傲北山早歸耄此語君勿疑老彭跨商周

同正輔表兄游白水山一首

偉哉造物真豪縱攫土搏沙爲此弄擘開翠峽走雲

雷截破奔流作潭洞因隨化人履巨迹得與仙兄躡
飛鞚曳杖不知巖谷深穿雲但覺衣裘重坐看驚鳥
救霜葉知有老蛟蟠石甕金沙玉礫粲可數古鏡寶
奩寒不動念兄獨立與世疎絕境難到惟我共永詞
角上兩蠻觸一洗胸中九雲夢浮來山高回望失武
陵路絕無人送筠籃擷翠爪甲香素縵分碧銀餅凍
歸路霏霏湯谷暗野堂堂活活神泉涌解衣浴此無垢
人身輕可試雲間鳳

與正輔游香積寺一首

越山少松竹常苦野火厄此峯獨蒼然感荷佛祖力
伏苓無人採千歲化琥珀幽光發中夜見者惟木客
我豈無長鑱真質苦難識靈苗與毒草疑似在毫髮
把玩竟不食棄置長太息山僧類有道辛苦常谷汲
我慚作機舂鑿破混沌穴幽尋恐不繼書板記歲月
次韻正輔同游白水山一首

祇知楚越爲天涯不知肝膽非一家此身如綫自縈
繞左回右轉隨繅車誤拋山林入朝市平地咫尺千
褒邪欲從穉川隱羅浮先與靈運開永嘉首參虞舜
款韶石次謁六祖登南華仙山一見五色羽雪樹兩
摘南枝花赤魚白蟹筋屢下黃柑綠橘籩常加糖霜

不待蜀客寄荔枝支莫信閩人誇恣傾白蜜收五稜去
聲細斷黃土栽三桎正輔分人參一苗歸種韶陽來詩本用啞
字惠州無書不見此字所出故且從木奉和朱明洞裏得靈草
翩然放杖凌蒼霞豈無軒車駕熟鹿亦有鼓吹號寒
蛙仙人勸酒不用勺石上自有樽壘窪徑從此路朝
玉闕千里莫遣毫釐差故人日夜望我歸相迎欲到
長風沙豈知乘槎天女側獨倚雲機看織紗世間誰
似老兄弟篤愛不復相疵瑕相攜行到水窮處庶幾
一見留子嗟千年枸杞常夜吠無數草棘工藏遮但
令凡心一洗濯神人仙藥不我遐山中歸來萬想滅
豈復回顧雙雲鴉

轍有白髮近二十年矣然止百餘莖不增
不減虔州道人王正彥教令拔去以真水
火養之恐不復更生從其言已數月而白
髮不出更年歲不見豈真不生耶子瞻兄
示我月中梳頭詩戲次來韻言拔白之驗
水上有車車自翻懸流如線垂前軒霜蓬已枯不再
綠有客勸我抽其根根根一去紫茸茁珍重已試幽
人言紛紛華髮不足道當返六十過去魂

和

夏畦流膏白雨翻北窗幽人臥羲軒風輪曉入春筍
節露珠夜上秋禾根或爲子言草木之長常在昧明間蚤作而
伺之乃見其枝起數寸竹笋尤甚又夏秋之交稻方含秀黃昏月出
露珠起于其根纍纍然忽自騰上若有推之者或入于莖心或垂于
葉端稻乃秀實驗之信然此二事與子由養生之說契故以此爲寄
從來白髮有公道始信丹經非妄言此身法報本無
二他年妙絕兼形魂傳燈錄有形神俱妙者乃不復□解化之
事

十一月九日夜夢與人論神仙道術因作

一詩八句既覺頗記其語錄呈子由弟後
四句不甚明了今足成之耳

析塵妙質本來空夢中於此句若了然有所得者更積微陽
一綫功照夜一燈長耿耿閉門千息自濛濛養成丹
竈無煙火點盡人間有暈銅寄語山神停伎倆不聞
不見我何窮

章質夫送酒六壺書至而酒不達戲作小

詩問之

白衣送酒舞淵明急掃風軒洗破觥豈意青州六從
事化爲烏有一先生空煩左手持新蟹漫繞東籬艷
落英南海使君今北海定分百榼餉春耕

小圃五詠

人參

上黨天下脊遼東真井底玄泉傾海腴白露洒天醴
靈苗此孕毓肩肢或具體移根到羅浮越水灌清泚
地殊風雨隔臭味終祖禰青楹綴紫萼圓實墮紅米
窮年生意足黄土手自啓上藥無炮炙齟齬盡根抵
開心定魂魄憂恚何足洗糜身輔吾生既食首重稽

地黃

地黃飼老馬可使光鑒人吾聞樂天語喻馬施之身
我衰正伏櫪垂耳氣不振移栽附沃壤蕃茂爭新春
沈水得穉根重湯養陳薪投以東阿清和以北海醇
崖蜜助甘冷山薑發芳辛融爲寒食錫嚙作瑞露珍
丹田自宿火渴肺還生津願餉內熱子一洗胸中塵

枸杞

神藥不自閔羅生滿山澤日有牛羊憂歲有野火厄
越俗不好事過眼等茨棘青萸春自長絳珠爛莫摘
短籬護新植紫筍生臥節根莖與花實收拾無棄物
大將玄吾鬢小則餉我客似聞朱明洞中有千歲質
靈厖或夜吠可見不可索仙人儻許我借杖扶衰疾

甘菊

越山春始寒霜菊晚愈好朝來出細粟稍覺芳歲老
孤根蔭長松獨秀無衆草晨光雖照耀秋雨半摧倒
先生臥不出黃葉紛可掃無人送酒壺空腹嚼珠寶
香風入牙頰楚些發天藻新萸蔚已滿宿根寒不槁
揚揚弄芳蝶生死何足道頗訝昌黎翁恨爾生不蚤

蕙苾

伏波飯蕙苾禦瘴傳神良能除五谿毒不救讒言傷
讒言風雨過瘴癘久亦亡兩俱不足治但愛草木長
草木各有宜珍產駢南荒絳囊懸荔支雪粉剖桃榔
不謂蓬荻姿中有藥與糧春爲苾珠圓炊作菰米香
子美拾橡栗黃精誑空腸今吾獨何者玉粒照生光

雨後行菜一首

夢回聞雨聲喜我菜甲長平明江路溼並岸飛雨槩
天公真富有膏乳瀉黃壤霜根一蕃滋風葉漸俯仰
未任筐筥載已作盃案想艱難生理窄一味敢專饗
小摘飯山僧清安寄真賞芥藍如菌蕈脆美牙頰響
白崧類羔豚冒土出躡掌誰能視火候小竈當自養

殘臘獨出二首

幽尋本無事獨往意自長釣魚豐樂橋採杞道遙堂
羅浮春欲動雲日有清光處處野梅開家家臘酒香

路逢眇道士疑是左元放我欲從之語恐復化爲羊
江邊偶微行詰曲背城市平湖春草合步到栖霞寺
堂空不見人老穉掩關睡所營在一食食已寧復事
客來豈無得施子淨掃地風松獨不靜送我作鼓吹
新年五首

曉雨暗人日春愁連上元水生挑菜渚煙溼落梅村
小市人歸盡孤舟鶴蹋翻猶堪慰寂寞漁火亂黃昏
北渚集羣鷺新年何所之盡歸喬木寺分占結巢枝
生物會有役謀身各及時何當禁畢弋看引雪衣兒
海國空自暖春山無限清水谿結瘴雨雪菌到江城
更待輕雷發先催凍筍生豐湖有藤菜似可敵蓴羹
小邑浮橋外青山石岸東茶槍燒後有麥浪水前空
萬戶不禁酒二年真識翁結茆來此住歲晚有誰同
荔子幾時熟花頭今已繁探春先揀樹買夏欲論園
居士常攜客參軍許扣門明年更有味懷抱帶諸孫
二月八日與黃燾僧曇穎過逍遙堂何道
士宗一問疾一首

安心守玄牝閉眼覓黃庭問疾來三士澆愁有半餅
風松時落藥病鶴不梳翎樽空我歸去山月照君醒
次韻高要令劉湜峽山寺見寄一首

新聞妙無多舊學閑可束猶當隱季生未遽逃梅福
空腸吐餘思靜似蠶綴簇寸田結初果秀若銅生綠
荆棘掃誠盡梨棗憂不熟高人寧鑄金下士乃服玉
君看嶺嶠隘我欲巾笥蓄曾攀羅浮頂亦到朱明谷
旋觀真歷塊歸臥甘破屋故人老猶仕世味薄如穀
偶從越女笑不怕蠻江浴驚聞尺書到喜有新詩辱
應憐五管客曾作八州督骨消讒口鏗膽破獄吏酷
壠雲不易寄江月乃可掬遙知清遠寺不稱空洞腹
蹇驢步武碎短瑟絃柱促仰看泉落珮俯聽石響轂
千峯瀉清駛一往無回踟狂雷失晤語過電不容目
要知僧長飢正坐山少肉人間無南北蝸角空出縮
仇池九十九仇池有九十九泉予嘗夢至有詩嵩山三十六
子由近買田陽翟北望嵩山甚近天人同一夢仙凡無兩錄
陋邦真可老生理亦粗足便回燕天焰長作照海燭
燕天焰見退之詩近黃魯直寄詩云蓮花合裏一寸燭牝馬海中燒
百川魯直蓋近有得也

食荔支二首并引

惠州太守東堂祠故相陳文惠公堂下有公手植荔
支一株郡人謂將軍樹今歲大熟賞啖之餘下逮吏
卒其高不可致者縱猿取之

丞相祠堂下將軍大樹旁炎雲駢火寶瑞露酌天漿
爛紫垂先熟高紅挂遠揚分甘徧鈴下也到黑衣郎
羅浮山下四時春盧橘楊梅次第新日啖荔枝三百
顆不妨長作嶺南人

和子由盆中石菖蒲忽生九花一首

春蕙秋莢兩須臾神藥人間果有無無鼻何由識蒼
畬有花今始信菖蒲芳心未飽兩蛺蝶寒意知鳴幾
蟪蛄記取明年十二節小兒休更籀霜鬚

遷居一首

吾紹聖元年十月二日至惠州寓合江樓是月十八
日遷于嘉祐寺二年三月十九日復遷于合江樓三
年四月二十日復歸于嘉祐寺時方卜築白鶴峯之
上新居成庶幾其少安乎

前年家水東回首夕陽麗去年家水西溼面春雨細
東西兩無擇緣盡我輒逝今年復東徙舊館聊一憇
已買白鶴峯規作終老計長江在北戶雪浪舞吾砌
青山滿牆頭髮鬢幾幾雲髻雖慚抱朴子金鼎陋蟬蛻
猶賢柳柳州廟俎薦丹荔吾生本無待俯仰了此世
念念自成劫塵塵各有際下觀生物息相吹等蚊蚋

兩橋詩并引

惠州之東江谿合流有橋多廢壞以小舟渡羅浮道士鄧守安始作浮橋以四十舟爲二十舫鐵鎖石可隨水漲落榜曰東新橋州西豐湖上有長橋屢作屢壞栖禪院僧希固築進兩岸爲飛閣九間盡用石鹽木堅若鐵石榜曰西新橋皆以紹聖三年六月畢工作二詩落之

東新橋

羣鯨貫鐵索背負橫空霓首搖鬣雪江尾插崩雲谿機牙任信縮漲落隨高低轆轤卷巨索青蛟挂長堤奔舟免狂觸脫筏防撞擠一橋何足云謹傳廣東西父老有不識喜笑爭攀躋魚龍亦驚逃雷雹生馬蹏嗟此病涉久公私困留稽姦民食此險出沒如鳧鷖似賣失船壺如去登樓梯不知百年來幾人隕沙泥豈知濤瀾上安若堂與閨往來無晨夜醉病休扶攜使君飲我言妙割無牛雞不云二子勞歎我捐腰犀二子造橋予嘗助施犀帶我亦壽使君一言聽扶藜常當修未壞勿使後噬臍

西新橋

昔橋本千柱挂湖如斷霓浮梁陷積淖破板隨奔谿笑看遠岸沒坐覺孤城低聊因三農隙稍進百步堤

炎州無堅植潦水輕推擠千年誰在者鐵柱羅浮西
獨有石鹽木白蟻不敢躋似開銅駝峯如鑿鐵馬蹏
岌岌類鞭石山川非會稽嗟我久閣筆不書紙尾鷺
蕭然無尺筮欲構飛空梯百夫下一杙椽此百尺泥
橋柱石礫之下皆有堅木椽入泥中文餘謂之頂樁探囊賴故侯
寶錢出金閨子由之婦史項入內得賜黃金錢數十助施父老
喜雲集篋壺無空攜三日飲不散殺盡西村雞似聞
百歲前海近湖有犀橋下舊名鱷湖蓋嘗有鮫鱧之類那知
陵谷變枯瀆生芟藜後來勿忘今冬涉水過臍

悼朝雲詩并引

紹聖元年十一月戲作朝雲詩二年七月五日朝雲
病亡於惠州葬之栖禪寺松林中東南直大聖塔予
既銘其墓且和前詩以自解朝雲始不識字晚忽學
書粗有楷法蓋嘗從泗上比丘尼義冲學佛亦略聞
大義且死誦金剛經四句偈而絕
苗而不秀豈其天不使童烏與我玄駐景恨無千歲
藥贈行唯有小乘禪傷心一念償前債彈指三生斷
後緣歸臥竹根無遠近夜燈勤禮塔中仙

東坡後集卷第五

東坡後集卷第六

詩六十七首

丙子重九二首

三年瘴海上越嶠真我家登山作重九蠻菊秋未花
唯有黃茆根堆堆穠生物窳螟酒蘖衆毒酸甜如梨櫨
何以侑一罇隣翁魄蠹蛇亦復強取醉歡謠雜悲嗟
今年吁惡歲僵仆如亂麻此會我雖健狂風卷朝霞
使我如霜月孤光挂天涯西湖不欲往墓樹號寒鴉
窮塗不擇友過眼如亂雲餘子誰復數坐閱兩使君
共飲去年堂俯看秋水紋此水與此人相追兩泫泫
老去各休息造物嗟長勤佳哉此令節不惜與子分
何以娛我客游魚在清瀆水師三百指鐵網欲掩羣
獲多雖一快買放尤可欣此樂真不朽明年我歸耘

白鶴峯新居欲成夜過西鄰翟秀才二首

林行婆家初閉戶翟夫子舍尚留關連娟缺月黃昏

後縹緲新居紫翠間繫悶豈無羅帶水韓退之二云水作

青羅帶山爲碧玉簪割愁腸皆嶺南詩也中原北望無歸日鄰火

劍鉞秋來處處割劍鉞山柳子厚云海上小尖峯若

村春自往還

壘間畢卓防偷酒壁後匡衡不點燈待鑿平江百尺

井要分清暑一壺水佐卿恐是歸來鶴次律寧非過
去僧他日莫尋王粲宅夢中來往本何曾

次韻子由所居六詠

堂前種山丹錯落馬腦盤堂後種秋菊碎金收辟寒
草木如有情慰此芳歲闌幽人正獨樂不知行路難
詩人故多感花發憶兩京石榴有正色玉樹真虛名
粲粲秋菊花卓爲霜中英萸槃照重九纈藥兩鮮明
幽居有古意義井分西牆誰言三伏熱上須一盃涼
先生坐忍渴羣囂自披猖衆散徐酌飲逡巡味尤長
先生飯土墻無物與劉义何以娛醉客時輟砌下花
井水分西鄰竹陰借東家蕭然行脚僧一身寄天涯
東齋手種柏今復幾尺長知有桓司馬榛莠爲遮藏
近聞南臺松新枝出餘僵年來此懷抱豈復驚凡士
新居已覆瓦無復風雨憂橙栽與籠竹小詩亦可求
尚欲煩貳師刻山出飛流應須鑿百尺兩綆載一牛
吳子野絕粒不睡過作詩戲之芝上人陸
道士皆和予亦次其韻

聊爲不死五通仙終了無生一大緣獨鶴有聲知半

夜老蠶不食已三眠憐君解比人間夢芝有夢齋子由

作銘許我時逃醉後禪會與江山成故事不妨詩酒

樂新年

次韻惠循二守相會一首

共惜相從一寸陰，酒盃雖淺意殊深。且同月下三人影，莫作天涯萬里心。東嶺近開松菊徑，南堂初絕斧斤音。知君善頌如張老，猶望攜壺更一臨。

又次韻二守同訪新居二首

數畝蓬蒿古縣陰，曉窗清快夜堂深。也知卜築非真宅，聊欲跣趺看此心。聞道攜壺問奇字，更因登木助微音。相娛北戶江千頃，直下都無地可臨。

此生真欲老牆陰，却掃都忘歲月深。拔薤已觀賢守政，折蔬聊慰故人心。風流賀監常吳語，憔悴鍾儀獨楚音。治狀兩邦俱第一，潁川歸去肯重臨。

循守臨行出小鬟復用前韻一首

學語雛鶯在柳陰，臨行呼出翠帷深。通家不隔同年面，二守同年家得路。方知異日心趁著，春衫游上苑。要
求國手教新音，嶺梅不用催歸騎。截鐙須防舊所臨。
循守近爲韶倅

種茶一首

松間旅生茶已與松俱瘦，茨棘尚未容蒙翳。爭交構
天公所遺棄，百歲仍穉幼。紫笋雖不長，孤根乃獨壽。

移栽白鶴嶺土軟春雨後彌旬得連陰似許晚遂茂
能忘流轉苦戢戢出鳥味未仕供白磨且作資摘嗅
千團輸太官百餅銜私鬪何如此一啜有味出吾囿
白鶴山新居鑿井四十尺遇盤石石盡乃

得泉

海國困烝溽新居利高寒以彼陟降勞易此寢處乾
但苦江路峻常慚汲腰酸矻矻煩四夫磽磽斷層巒
彌旬得尋丈下有青石磐終日但迸火何時見飛瀾
豐我粲與醪利汝椎與鑽山石有時盡我意殊未闌
今朝僮僕喜黃土復可搏晨餅得雪乳莫甕滄冰湍
我生類如此何適不艱難一勺亦天賜曲肱有餘歡

三月二十九日二首

南嶺過雲開紫翠北江飛雨送淒涼酒醒夢回春盡
日閉門隱几坐燒香
門外橘花猶的皜牆頭荔子已爛斑樹暗草深人靜
處卷簾欹枕臥看山

吾謫海南子由雷州被命即行了不相知
至梧乃聞其尚在藤也旦夕當追及作此

詩示之

九疑聯縣屬衡湘蒼梧獨在天一方孤城吹角煙樹

裏落月未落江蒼茫幽人拊枕坐歎息我行忽至舜
所藏江邊父老能說子白須紅頰如君長莫嫌瓊雷
隔雲海 聖恩尚許遙相望平生學道真實意豈與
窮達俱存亡天其以我爲箕子要使此意留要荒他
年誰作輿地志海南萬古真吾鄉

行瓊儋間肩輿坐睡夢中得句云千山動
鱗甲萬谷酣笙鐘覺而遇清風急雨戲作
此數句

四州環一島百洞蟠其中我行西北隅如度月半弓
登高望中原但見積水空此生當安歸四顧真途窮
眇觀大瀛海坐詠談天翁茫茫太倉中一米誰雌雄
幽懷忽破散永嘯來天風千山動鱗甲萬谷酣笙鐘
安知非羣仙鈞天宴未終喜我歸有期舉酒屬青童
急雨豈無意催詩走羣龍夢雲忽變色笑雷亦改容
應怪東坡老顏衰語徒工久矣此妙聲不聞蓬萊宮
次前韻寄子由一首

我少卽多難遭回一生中百年不易滿寸寸彎強弓
老矣復何言榮辱今兩空泥丸尚一路 古語云十方薄

伽梵

一路涅槃門

所向餘皆窮似聞崆峒西仇池迎此

翁胡爲適南海復駕垂天雄下視九萬里浩浩皆積

風回望古合州屬此琉璃鍾離別何足道我生豈有
終渡海十年歸方鏡照兩童還鄉亦何有暫假壺公
龍我眉向我笑錦水爲君容天人巧相勝不獨數子
工指點昔游處蒿萊生故宮

安期生一首并引

安期生世知其爲仙者也然太史公曰蒯通善齊人
安期生嘗以策干項羽羽不能用羽欲封此兩人
兩人終不肯受亡去予每讀此未嘗不廢書而歎嗟
乎仙者非斯人而誰爲之故意戰國之士如魯連虞
卿皆得道者歟

安期本策士平日交蒯通嘗干重瞳子不見隆準公
應如魯仲連抵掌吐長虹難堪踞牀洗寧挹扛鼎雄
事旣兩大繆飄然籥遺風乃知經世士出世或乘龍
豈比山澤臞忍飢啖松柏縱使偶不死正堪爲僕僮
茂陵秋風客望祖猶蟻蠹海上如瓜棗可聞不可逢

夜夢一首并引

七月十三日至儋州十餘日矣澹然無一事學道未
至靜極生愁夜夢如此不免以書自怡

夜夢嬉游童子如父師檢責驚走書計功當畢春秋
餘今乃始及桓莊初怛然悸寤心不舒起坐有如挂

釣魚我生紛紛嬰百緣氣固多習獨此偏弃書事君
四十年仕不顧留書繞纏自視汝與丘孰賢易章三
絕丘猶然如我當以犀革編

遷居之夕聞鄰舍兒誦書欣然而作

幽居亂蛙黽生理半人禽蹉然已可喜況聞汝誦音
兒聲自圓美誰家兩青衿且欣習齊咻未敢笑越吟
九齡起韶石姜子家日南吾道無南北安知不生今
海關尚挂斗天高欲橫參荆榛短牆缺燈火破屋深
引書與相和置酒仍獨斟可以侑我醉琅然如玉琴

聞子由瘦一首儋耳至難得肉食

五日一見花豬肉十日一遇黃雞粥土人頓頓食藷
芋薦以熏鼠燒蝙蝠舊聞蜜啣嘗嘔吐稍近蝦蟆緣
習俗十年京國厭肥瘠日日烝花壓紅玉從來此腹
負將軍今者固宜安脫粟俗諺云大將軍食飽捫腹而歎曰
我不負汝左右曰將軍固不負此腹此腹負將軍未嘗出少智慮也
人言天下無正味卽且未遽賢麋鹿海康別駕復何
爲帽寬帶落驚僮僕相看會作兩臞仙還鄉定可騎
黃鵠

客俎經旬無肉又子由勸不讀書蕭然清
坐乃無一事

病怯鯉鹹不買魚爾來心腹一時虛使君不復憐烏
攫屬國方將掘鼠餘老去獨收人所弃游哉時到物
之初從今免被孫郎笑絳帕蒙頭讀道書

宥老楮一首

我牆東北隅張王維老穀樹先樗櫟大葉等桑柘沃
流膏馬乳漲墮子楊梅熟胡爲尋丈地養此不材木
蹶之得輿薪規以種松菊靖言求其用略數得五六
膚爲蔡侯紙子入桐君錄黃繒練成素黝面類作玉
灌灑烝生菌腐餘光吐燭雖無傲霜節幸免狂醒毒
孤根信微陋生理有倚伏投斧爲賦詩德怨聊相贖

觀棋一首并引

予素不解棋嘗獨游廬山白鶴觀觀中人皆闔戶晝
寢獨聞棋聲於古松流水之間意欣然喜之自爾欲
學然終不解也兒子過乃粗能者儻守張中日從之
戲予亦隅坐竟日不以爲厭也

五老峯前白鶴遺趾長松蔭庭風日清美我時獨游
不逢一士誰歟棋者戶外屢二不聞人聲時聞落子
紋枰坐對誰究此味空釣意釣豈在魴鯉小兒近道
剝啄信指勝固欣然敗亦可喜優哉游哉聊復爾耳

糴米一首

糴米買束薪百物資之市不緣耕樵得飽食殊少味
再拜請邦君願受一廛地知非笑昨夢食力免內愧
春秋幾時花夏稗忽已穉悵焉撫耒耜誰復識此意

入寺一首

曳杖入寺門輯杖挹世尊我是玉堂仙謫來海南村
多生宿業盡一氣中夜存日隨老鴉起飢食扶桑暎
光圓摩尼珠照耀玻璃盆來從佛印可稍覺魔忙奔
閑看樹轉午坐到鐘鳴昏斂收平生心耿耿聊自溫
次韻子由三首

東亭

仙山佛國本同歸世路玄關兩背馳到處不妨閑卜
築流年自可數期頤遙知小檻臨壘市定有新松長
棘茨誰道茆簷劣容膝海天風雨看紛披

東樓

白髮蒼顏自照盆董生端合是前身獨栖高閣多辭
客爲箸新書未絕麟小醉易醒風力軟安眠無夢雨
聲新長歌自詠真堪笑底處人間是所欣 柳子厚詩云
長歌返故室自謂非所欣

椰子冠

天教日飲欲全絲美酒生林不待儀自漉疎巾邀醉

客更將空殼付冠師前漢高紀注云薛有作冠師規摹簡
古人爭看簪導輕安髮不知更著短簷高屋帽東坡
何事不違時

次韻子由月季花再生一首

幽芳本長春暫瘁如蝕月且當付造物未易料枯枿
也知宿根深便作紫笋茁乘時出婉婉爲我暖栗冽
先生蚤貴重廟論推英拔而今城東瓜不記召南芡
陋居有遠寄小圃無闕躡還爲久處計坐待行年匝
子由明年六十臘果綴梅枝春盃浮竹葉誰言一萌動
已覺萬木活聊將玉蘂新世謂此玫瑰花插向綸巾折

次韻子由浴罷一首

理髮千梳淨風晞勝湯沐閉息萬竅通霧散名乾浴
頽然語默喪靜見天地復時令具薪水漫欲濯腰腹
陶匠不可求益斛何由足海南無浴器故常乾浴而已老
雞臥糞土振羽雙瞑目倦馬驅風沙奮鬣一噴玉垢
淨各殊性快愜聊自沃雲母透蜀紗琉璃瑩蘄竹稍
能夢中覺漸使生處熟楞嚴在牀頭妙偈時仰讀返
流歸照性獨立遺所矚未知仰山禪已就季主卜安
心會自得助長毋相督

借前韻賀子由生第四孫斗老一首

今日散幽憂彈冠及新沐況聞萬里孫已報三日浴
朋來四男子大壯泰臨復開書喜見面未飲春生腹
無官一身輕有子萬事足舉家傳吉夢殊相驚凡目
爛爛開眼電礲礲峙頭玉李賀詩云頭玉礲礲眉刷翠杜郎
生得真男子但令強筋骨可以耕衍沃不須富文章端
解耗紙竹君歸定何日我計久已熟長留五車書要
使九子讀吾與子由共九孫男矣簞瓢有內樂軒冕無流
矚人言适似我窮達已可卜蚤謀二頃田莫待八州
督吾前後典八州

獨覺一首

瘴霧二年恬不怪反畏北風生體疥朝來縮頸似寒
鴉焰火生薪聊一快紅波翻屋春風起先生默坐春
風裏浮空眼纈散雲霞無數心花發桃李翛然獨覺
午窗明欲覺猶聞醉鼾聲回首向來蕭瑟處也無風
雨也無晴

十二月十七日夜坐達曉寄子由一首

燈燼不挑垂暗藥爐香重撥上餘薰清風欲發鴉翻
樹缺月初升犬吠雲閉眼此心新活計隨身孤影舊
知聞雷州別乘應危坐跨海幽光與子分

謫居三適三首

日起理髮

安眠海自運浩浩潮黃宮日出露未晞鬱鬱濛濛霜松
老櫛從我久齒疎含清風一洗耳目明習習萬竅通
少年苦嗜睡朝謁常忽忽爬搔未云足已困冠巾重
何異服轅馬沙塵滿風駿珂鞍響珂月實與枉械同
解放不可期枯柳豈易逢誰能書此樂獻與腰金公

午窗坐睡

蒲團盤兩膝竹几閣雙肘此間道路熟徑到無何有
身心兩不見息息安且久睡蛇本亦無何用鉤與手
神凝疑夜禪體適劇卯酒我生有定數祿盡空餘壽
枯楊下飛花膏澤回衰朽謂我此爲覺物至了不受
謂我今方夢此心初不垢非夢亦非覺請問希夷叟

夜臥濯足

長安大雪年束薪抱衾裯雲安市無井斗水寬百憂
今我逃空谷孤城嘯鴉鷓鷓得米如得珠食菜不敢留
況有松風聲釜鬻鳴颼颼瓦盎深及膝時復冷暖投
明燈一爪翦快若鷹辭韝天低瘴雲重地薄海氣浮
土無重髓藥獨以薪水瘳誰能更包裹冠履裝沐猴

子由生日一首

上天不難知好惡與我一方其未定間人力破陰隲

少忍待其定報應真可必季氏生而仁觀過見其實
端如柳下惠焉往不二黜天有時而定壽考未易畢
兒孫七男子三子四孫次第皆逢吉遙知設羅門獨掩
懸罄室回思十年事無愧篋中筆但願白髮兄年年
作生日

以黃子木拄杖爲子由生日之壽一首

靈壽扶孔光菊潭飲伯始雖云閑草木豈樂蒙此取
一時偶收用千載相瘕痕海南無佳植野果名黃子
堅瘦多節目天材任操倚嗟我始剪裁世用或緣此
貴從老夫手往配先生几相從歸故山不愧仙人杞
本草枸杞一名仙人杖

過於海舶得邁寄書酒作詩遠和之皆粲
然可觀子由有書相慶也因用其韻賦一
篇并寄諸子姪一首

我似老牛鞭不動雨滑泥深四蹄重汝如黃犢走卻
來海關山高百程送庶幾門戶有入慈不恨居鄰無
二仲他年汝曹笏滿床中夜起舞踏破甕會當洗眼
看騰躍莫指癡腹笑空洞譽兒雖是兩翁癖積德已
自三世種豈惟萬一許生還尚恐九十頰珍從六子
晨耕簞瓢出衆婦夜績燈火共春秋古史乃家法詩

筆離騷亦時用但令文字還照世糞土腐餘安足夢

上元夜過赴儋守召獨坐有感一首戊寅

歲

使君置酒莫相違守舍何妨獨掩扉靜看月窗盤蜴
蜥臥聞風幔落蟬蟻燈花結盡吾猶夢香篆消時汝
欲歸搔首淒涼十年事傳柑歸遺滿朝衣

海南人不作寒食而上巳上冢予攜一

瓢酒尋諸生皆出矣獨老符秀才在因與
飲至醉符蓋儋人之安貧守靜者也

老鴉銜肉紙飛灰萬里家山安在哉蒼耳林中太白
過鹿門山下德公回管寧投老終歸去王式當年本
不來記取城南上巳日木繇花落刺桐開

新居一首

朝陽入北林竹樹散疎影短籬尋丈間寄我無窮境
舊居無一席逐客猶遭屏結茅得茲地翳翳村巷永
數朝風雨涼畦菊發新穎俯仰可卒歲何必謀二頃

五色雀一首

海南有五色雀常以兩絳者爲長進止必隨焉俗謂
之鳳皇云久旱而見輒雨潦則反是吾卜居儋耳城
南嘗一至庭下今日又見之進士黎子雲及其弟威

家既去吾舉酒祝之曰若爲吾來者當再集也已而果然乃爲賦詩

粲粲五色羽炎方鳳之徒青黃編玄服翼衛兩紱朱仁心知閔農常告雨霽符我窮惟四壁破屋無瞻烏惠然此粲者來集竹與梧鏘鳴如玉佩意欲相嬉娛寂寞兩黎生食菜直隳儒小圃散春物野桃陳雪膚舉盃盃得一笑見此紅鸞雛高情如飛仙未易握栗呼胡爲去復來眷眷豈屬吾回翔天壤間何必懷此都

倦夜一首

倦枕厭長夜小窗終未明孤村一犬吠殘月幾人行衰鬢久已白旅懷空自清荒園有絡緯虛織竟何成用過韻冬至與諸生飲酒一首

小酒生黎法乾糟凡盎中芳辛知有毒滴瀝取無窮凍醴寒初泫春醅暖更饒華夷兩樽合醉笑一歡同里閨峩山北田園震澤東歸期那敢說安訊不曾通鶴鬢驚全白犀圍尚半紅愁顏解符老壽耳鬪吳翁得穀鵝初飽亡猫鼠益豐黃薑收土芋蒼耳斫霜叢兒瘦緣儲藥奴肥爲種松頻頻非竊食數數尚乘風河伯方夸若靈媧自舞馮歸途陷泥淖炬火燎茅蓬膝上王文度家傳張長公和詩仍醉墨戲海亂羣鴻

符吳皆坐客其餘皆卽事實錄也

縱筆二首

寂寂東坡一病翁
白須蕭散滿霜風
小兒誤喜朱顏在
一笑那知是酒紅
父老爭看烏角巾
應緣曾現宰官身
谿邊古路三叉口
獨立斜陽數過人
北船不到米如珠
醉飽蕭條半月無
明日東家知祀竈
隻雞斗酒定贖吾

貧家淨掃地一首

貧家淨掃地
貧女好梳頭
下士晚聞道
聊以拙自修
扣門有佳客
一飯相邀留
春炊勿草草
此客未易媮
慎勿用勞薪
感我如薰蕕
德人抱衡石
銖黍安可廋
次韻子由贈吳子野先生二絕句

馬迹車輪滿四方
若爲閉著小茆堂
仙心欲捉左元放
癡疾還同顧長康
江令蒼苔圍故宅
謝家語鶯集華堂
先生笑說江南事
祇有青山繞建康

被酒獨行徧至子雲威徽先覺四黎之舍

二首

半醒半醉問諸黎
竹刺藤梢步步迷
但尋牛矢覓歸

路家在牛欄西復西

總角黎家三小童口吹葱葉送迎翁莫作天涯萬里
意谿邊自有舞雩風

符老風情柰老何朱顏減盡鬢絲多投梭每困東鄰
女換扇唯逢春夢婆是日復見符林秀才說換扇之事

夜燒松明火一首

歲莫風雨交客舍淒薄寒夜燒松明火照室紅龍鸞
快焰初煌煌碧煙稍團團幽人忽富貴總帳芬椒蘭
珠煤綴屋稍香澗音詰松瀝也出本章注流銅槃坐看十
八公俯仰灰燼殘齊奴朝爨蠟萊公夜長歎海康無
此物燭盡更未闌

庚辰歲人日作時聞黃河已復北流老臣
舊數論此今斯言乃驗

老去仍栖隔海村夢中時見作詩孫天涯已慣逢人
日歸路猶欣過鬼門三策已應思賈讓孤忠終未赦
虞翻典衣剩買河源米屈指新筍作上元

不用長愁挂月村檳榔生子竹生孫海南勒竹每節生枝
如竹竿大蓋竹孫也新巢語燕還窺硯舊雨來人不到門

春水蘆根看鶴立夕陽楓葉見鴉翻此生念念隨泡
影莫認家山作本元

庚辰歲正月十二日天門冬酒熟予自漉
之且漉且嘗遂以大醉二首

自撥床頭一罌雲幽人先已醉濃芬天門冬熟新年
喜淘米春香並舍聞杜子美詩云聞道雲安淘米春蓋酒名也
菜圃漸疎花漠漠竹扉斜掩雨紛紛擁裘睡覺知何
處吹面東風散纈紋

載酒無人過子雲年來家醞有奇芬醉鄉杳杳誰同
夢睡息勦勦得自聞口業向詩猶小小眼花因酒尚
紛紛點鏡更試淮南語汎溢東風有穀紋淮南子云東
風至而酒汎溢許慎注云酒汎清酒也

追和戊寅歲上元一首

春鴻社鷺巧相違白鶴峯頭白板扉石建方欣洗滌
廁姜龐不解歎蠨蟻一龕京口嗟春夢萬炬錢塘憶
夜歸合浦賣珠無復有當年笑我泣牛衣

題過所畫枯木竹石

老可能爲竹寫真小坡今與石傳神山僧自覺菩提
長心境都將付臥輪

散木支離得自全交柯蚴蟻欲相纏不須更說能鳴
鴈要以空中得盡年

倦看澁勒暗蠻村亂棘孤藤束瘴根唯有長身六君

子依依猶得似淇園

真一酒歌并引

布算以步五星不如仰觀之捷次律以求中聲不如耳齊之審鉛汞以爲藥策易以候火不如天造之真也是故神宅空樂出虛踟踟者以氣升孰能推是類以求天造之藥乎於此有物其名曰真一遠游先生方治此道不飲不食而飲此酒食此藥居此堂予亦竊其一二故作真一之歌其詞曰

空中細莖插天芒不生沮澤生陵岡涉閱四氣更六陽森然不受螟與蝗飛龍御月作秋涼蒼波改色屯雲黃天旋雷動玉塵香起搜十裂照坐光跏趺牛噉安且詳動搖天關出瓊漿壬公飛空丁女藏三伏遇井了不嘗釀爲真一和而莊三杯儼如侍君王湛然寂照非楚狂終身不入無功鄉

東坡後集卷第六